

Oifig an Stiúrthóra Ionchúiseamh Poiblí,
14 - 16 Sráid Mhuirfean,
Baile Átha Cliath 2.

Teil: + 353 1 678 9222

Faics: + 353 1 661 0915

Láithreán Gréasáin: www.dppireland.ie

An Rannán Aturnaetha,
Teach Caibidle,
26 - 30 Sr. na Mainistreach Uachtarach,
Baile Átha Cliath 1.

Tel: +353 1 858 8500

Fax: +353 1 858 8555

Láithreán Gréasáin: www.dppireland.ie

CLÁR

CUID I:	OBAIR NA hOIFIGE I gCOITINNE	3
Caibidil 1:	Feidhmeanna an Stiúrthóra Ionchúiseamh Poiblí	4
Caibidil 2:	Rannáin na hOifige	5
CUID II:	ATHBHREITHNIÚ AR AN mBLIAIN	9
Caibidil 3:	Forbairtí Eagrúcháin	10
CUID III:	FORBAIRTÍ DLÍTHIÚLA	15
Caibidil 4:	Cinntí Dlíthiúla	16
Caibidil 5:	Díspeagadh Cúirte	20
Caibidil 6:	Ionchúisimh thar ceann an Údaráis Sláinte & Sábháilteachta	22
Caibidil 7:	Gnéithe a bhaineann le Pianbheitheanna	24
Caibidil 8:	Comhar Idirnáisiúnta	26
Caibidil 9:	An Barántas Gabhála Eorpach	28
CUID IV:	SAORÁIL FAISNÉISE	29
Caibidil 10:	Saoráil Faisnéise	30
CUID V:	STAITISTICÍ	33
Caibidil 11:	Staitisticí maidir le Comhaid Ionchúisimh	34
Caibidil 12:	Achomaireacht as Cuntas Leithreasa 2002	49
Caibidil 13:	An tAcht um Íoc Pras Cuntas, 1997	50
CUID VI:	CAIRTEACHA	51
Caibidil 14:	Achoimre ar an bPróiseas Ionchúisimh Choiriúil	52
Caibidil 15:	Struchtúr Eagrúcháin	53
PART VII:	AGUISÍN	55



Is mór an sásamh domsa tuarascáil bhliantúil Oifig an Stiúrthóra Ionchúiseamh Poiblí do 2003 a chur i láthair.

Is bliain chomhdhlúthaithe den chuid is mó a bhí sa bhliain 2003 i gcás na hOifige leathnaithe a bhfuil, ó 2001, an tseirbhís a bhíodh á soláthar tráth ag an bPríomh-Atur nae Stáit anois mar chuid de m'Oifige faoi cheannas an Phríomh-Atur nae Ionchúisimh. Tá roinnt uailmhianta tábhachtacha de chuid na hOifige, ag tráth scríofa na tuarascála seo, fós nach bhfuil bainte amach. Tá comhráite ar siúl maidir le haistriú sheirbhís an Atur nae Stáit ón Ard-Aighne go dtí Oifig an Stiúrthóra Ionchúiseamh Poiblí. Tá reachtaíocht chun an t-aistriú a bhaint amach ullmhaithe agus tabharfaidh an tOireachtas isteach go luath é. Táthar ag tnúth go dtarlóidh an t-aistriú sin go luath amach anseo.

Tá an fhadhb maidir le cóiríocht na hOifige fós gan réiteach. Tá an Oifig lonnaithe i dhá shuíomh. Sráid na Mainistreach Uachtarach agus Sráid Mhuirfean, rud a chruthaíonn bac ar lánpháirtíú dhá oifig ar leithligh mar a bhí, agus mar thoradh air sin bíonn taisteal neamhriachtanach a chuireann am amú idir an dá shuíomh. De réir mar a rachaidh an clár díláraithe ar aghaidh, tuigtear go mbeidh spás oiriúnach Oifige ar fáil. San fhadtárma, d'fhéadfadh an mhoill maidir le réiteach na faidhbe cóiríochta a bheith ina buntáiste, mar go bhfuil sé beartaithe anois coimpléasc nua cúirteanna coiriúla a thógáil a chuireadh formhór na gcúirteanna coiriúla a bhíonn ag fónamh do Bhaile Átha Cliath. Beidh sé inmhianta ar ndóigh go mbeidh Oifig an Stiúrthóra Ionchúiseamh Poiblí in aice leis an ionad nua sin.

I láthair na huairé táimid ag tabhairt faoi mhórhionscadal Teicneolaíochta Eolais, atá dírithe ar chóras bainistíochta eolais níos fearr do gach gné de riarachán na hOifige. Áireofar air sin córas cás-bhainistíochta. Níl na córais atá faoi láthair againn dóthanach d'Oifig mhéadaithe agus dár riachtanais a bhíonn go síoraí ag éirí níos sofaisticiúla. Cuirfidh seo ar ár gcumas faisnéis i bhfad níos cuimsithí a fháil, agus a úsáid, dúinn féin agus chun staitisticí níos mionsonraithe agus cinn ar féidir brath níos fearr orthu a sholáthar don phobal leasmhar inár dtuarascálacha bliantúla.

Is liomsa buíochas a ghlacadh leis na daoine ar m'fhoireann as an dianobair atá déanta acu agus as an tiomantas a léirigh siad i 2003. Ba mhaith liom buíochas a ghlacadh freisin leis na daoine sin nach comhaltaí de m'Oifig iad a ghníomhaíonn thar ár gceann sna cúirteanna, idir chomhaltaí den Bharra agus Atur nae Stáit. Ar deireadh, glacaim buíochas leis na daoine eile sin a mbíonn idirghníomhú ag an Oifig leo inár ngnó ó lá go lá, go háirithe comhaltaí den Gharda Síochána agus de ghníomhaireachtaí imscrúdaithe eile, an tSaotharlann Díl-Eolaíochta, na Paiteolaithe Stáit, agus go leor finnéithe gairmiúla eile, agus an fhoireann ón tSeirbhís Chúirteanna. Gan a ngairmiúlacht ní bheadh ar ár gcumas ár sprioc a bhaint amach thar ceann Phobal na hÉireann agus seirbhís ionchúisimh a sholáthar atá neamhspleách, cothrom agus éifeachtach.

James Hamilton

An Stiúrthóir Ionchúiseamh Poiblí

CUID I
OBAIR NA hOIFIGE I gCOITINNE

CAIBIDIL 1

FEIDHMEANNA AN STIÚRTHÓRA IONCHÚISEAMH POIBLÍ

- 1.1 Bunaíodh oifig an Stiúrthóra Ionchúiseamh Poiblí leis an Acht um Ionchúiseamh i gCionta, 1974, lenar tugadh don Stiúrthóir “na feidhmeanna go léir is féidir leis an Ard-Aighne a chomhlíonadh” díreach roimh an Acht a rith.
- 1.2 Is é atá sa phríomhfheidhm díobh sin ná an chumhacht chun ionchúiseamh a dhéanamh i leith cionta coiriúla. Is ó Airteagal 30 de Bhunreacht na hÉireann a thagann an chumhacht chun ionchúiseamh a dhéanamh i leith cionta indíotáilte (is iad sin na cionta is tromaí a thriailtear os comhair giúiré nó sa Chúirt Choiriúil Speisialta. Tagann an chumhacht chun ionchúiseamh a dhéanamh i leith cionta achoimre ón Acht Breithiúnais Coiriúla (Riara), 1924. An Stiúrthóir amháin atá in ann ionchúiseamh a dhéanamh i leith cásanna indíotáilte, ach is féidir le hAírí, Ranna Stáit nó daoine aonair ag feidhmiú dóibh mar “faisnéisithe príobháideacha” ionchúiseamh a dhéanamh i leith cionta achomaire freisin.
- 1.3 An Acht um Ionchúiseamh i gCionta, 1974, rinneadh feidhmeanna an Ard-Aighne maidir le hachainíocha toghcháin agus reifrinn a thabhairt don Stiúrthóir.
- 1.4 Chun tuairisc níos mine ar fheidhmeanna an Stiúrthóra a fháil, iarrtar ar léitheoirí Tuarascálacha Bliantúla na hOifige do na blianta 1998 agus 1999 agus an Ráiteas maidir le Treoirínte Ginearálta d’Ionchúisitheoirí, a d’fhoilsigh an Stiúrthóir sa bhliain 2001, a léamh. Tá na doiciméid sin ar fáil ar láithreán gréasáin na hOifige ag www.dppireland.ie.
- 1.5 Is é misean an Stiúrthóra Ionchúiseamh Poiblí agus misean a Oifige ná “seirbhís ionchúisimh atá neamhspleách, cóir agus éifeachtach a chur ar fáil thar ceann Mhuintir na hÉireann”.

CAIBIDIL 2

RANNÁIN NA hOIFIGE

- 2.1 Tá trí phríomhrannán ann in Oifig an Stiúrthóra Ionchúiseamh Poiblí: An Rannán Stiúrtha; Rannán na nAturnaetha; agus An Rannán Riaracháin.

AN RANNÁN STIÚRTHA

- 2.2 Oibríonn Oifig an Stiúrthóra Ionchúiseamh Poiblí go dlúth leis an nGarda Síochána agus le gníomhaireachtaí eile imscrúdúcháin, lena n-áirítear Ranna Rialtais, na Coimisinéirí Ioncaim, an tAturnae Ioncaim, An Post, An tÚdarás Iomaíochta, An Stiúrthóir um Fhorfheidhmiú Corparáideach, An tÚdarás Sláinte agus Sábháilteachta, agus, uaireanta, le gníomhaireachtaí eile Stáit agus le húdaráis áitiúla. Le linn cinntí a dhéanamh maidir le hionchúisimh, áfach, tá an Stiúrthóir agus a Oifig neamhspleách ar an ngníomhaireacht imscrúdúcháin lena mbaineann.
- 2.3 Tá líon suntasach tascanna coimhdeacha ann a chuireann an Oifig i gcrích i bhfeidhmiú a príomhfheidhmeanna. Tá achoimre ar chuid mhór gnéithe den obair sin le fáil sa sliocht as ár dTuarascáil Bhliantúil don bhliain 1999 ar leathanach 56. Áirítear iontu dréachtú nó socrú a dhéanamh maidir le doiciméid atá ag teastáil chun iarrataí ar eiseachadhadh isteach sa Stát a thabhairt ar aghaidh mar aon le hiarrataí a dhéanamh ar chabhair fhrithpháirteach idirnáisiúnta in ábhair choiriúla. Fónann daoine de chuid na hOifige ar choiste agus freastalaíonn siad ar chruinnithe a bhaineann le hionchúiseamh agus leis an dlí coiriúil agus leis an nós imeachta coiriúil. Ina theannta sin, déanann an Oifig comhdhálacha ar chúrsaí ionchúisimh a eagrú ar bhonn bliantúil.
- 2.4 Feidhmíonn an Stiúrthóir feidhm thábhachtach i dtaca le hionchúiseamh a dhéanamh i leith cionta de bhun an Achta um Chuintaí in aghaidh an Stáit, 1939. Tá cumhachtaí agus dualgais ar leith aige mar a fhoráiltear le hait 45 go 48 den Acht sin. Baineann na cumhachtaí agus na dualgais sin le srian a chur, i gcásanna áirithe, ar an gceart ginearálta bunreachtúil chun triail a fháil le giúiré. I gcásanna den sórt sin, is féidir daoine a thriail i gCúirt Choiriúil Speisialta gan ghiúiré seachas sna gnáthchúirteanna agus tá feidhmeanna sonraithe ag an Stiúrthóir maidir le hordacháin agus deimhnithe a eisiúint i gcás inarb é a thuairim nach leor na gnáthchúirteanna chun riaradh éifeachtach an cheartais a áirithiú.
- 2.5 Tá feidhmeanna eile ann a chomhlíonann an Stiúrthóir i dtaca le hionchúiseamh a dhéanamh i leith cionta, mar shampla Toilithe a eisiúint chun a chumasú go ndéileálfar go hachomair le cionta indíotáilte áirithe. Tugtar achoimre ar na feidhmeanna sin sa sliocht as Tuarascáil Bhliantúil 1999 ar leathanach 56.
- 2.6 Feidhmíonn an Stiúrthóir feidhmeanna ilghnéitheacha áirithe eile i ndáil le hachainíocha toghcháin agus reifrinn agus faoi Achtanna na gCuideachtaí.
- 2.7 Mar chuid dá fheidhm i ndáil lena chinntiú go ndéantar ionchúisimh choiriúla a sheoladh go cuí, tá an Stiúrthóir freagrach as Abhcóidí a ainmniú, agus as teagasc a thabhairt dóibh, le haghaidh na gcúirteanna éagsúla trialach, agus le haghaidh na hArd-Chúirte agus na Cúirte Uachtaraí agus le haghaidh na Cúirte Achomhairc Choiriúil. Ina theannta sin, déanann an Oifig táillí Abhcóidí a iarrtar orthu gníomhú thar ceann an Stiúrthóra a chinneadh agus a íoc.
- 2.8 Tá 19 n-oifigeach ghairmiúla (aturnaetha agus abhcóidí) sa Rannán Stiúrtha agus cabhraíonn siad leis an Stiúrthóir i gcomhlíonadh a feidhmeanna, agus go háirithe i gcomhlíonadh na bpríomhfheidhmeanna i dtaca le cinneadh a dhéanamh i dtaobh an ndéanfar nó nach ndéanfar ionchúiseamh agus i dtaobh maoirsiú a dhéanamh ar sheoladh ionchúiseamh tar éis iad a thionscnamh.

Neamhspleáchas

- 2.9 Luach tábhachtach de chuid na hOifige is ea

neamhspleáchas an Stiúrthóra Ionchúiseamh Poiblí. Tá sé aitheanta ag an gCúirt Uachtarach go bhfuil feidhmeanna ionchúisimh an Ard-Aighne, dá bhforáiltear sa Bhunreacht, le feidhmiú go neamhspleách ar an Rialtas. Rinneadh na feidhmeanna sin a aistriú chuig an Stiúrthóir Ionchúiseamh Poiblí leis an Acht um Ionchúiseamh i gCionta, 1974.

- 2.10 Luaitear mar a leanas in alt 2(5) den Acht um Ionchúiseamh i gCionta, 1974: ‘Beidh an Stiúrthóir neamhspleách ag comhlíonadh a fheidhmeanna dó’. Le halt 6 d’Acht 1974, cosnaítear neamhspleáchas an Stiúrthóra trí oibleagáid a chur ar an Stiúrthóir agus ar a chuid oifigeach gan aird a thabhairt ar chumarsáid nó ar uiríoll más rud é gurb ionann í nó é agus cur isteach míchuí ar chomhlíonadh a bhfeidhmeanna.

Uiríll agus Cumarsáidí

- 2.11 De bhun alt 6 den Acht um Ionchúiseamh i gCionta, 1974, tá sé mídhleathach cumarsáid a dhéanamh leis an Stiúrthóir d’fhonn a thabhairt go ndéanfaí cinneadh go dtarraingeofaí siar nó nach dtionscnófaí ionchúiseamh. Ní bhaineann an toirmeasc sin le páirtithe gaolmhara, le duine a bhfuil drochamhras ann ina leith ná le cúisí, ná lena gcomhairleoir dlí nó liachta, lena n-oibrí sóisialta ná le duine dá dteaghlach.

RANNÁN NA nATURNAETHA

- 2.12 Áirítear na nithe seo a leanas in obair Rannán na nAturnaetha a bhfuil an Príomh-Aturnae Ionchúisimh i gceannas air:

- Ag gníomhú mar aturnae don Stiúrthóir Ionchúiseamh Poiblí agus ag obair leis na Gardaí le linn na hionchúisimh choiriúla indiotáilte go léir a liostaítear le haghaidh Bhaile Átha Cliath a ullmhú agus a thíolacadh. Áirítear sa mhéid sin trialacha sa Chúirt Chuarda Choiriúil, sa Chúirt Choiriúil Speisialta agus sa Phríomh-Chúirt Choiriúil, mar aon le hachomhairc chun na Cúirte Achomhairc

Choiriúil tar éis duine a bheith ciontaithe agus pianbhreith a bheith gearrtha air nó uirthi.

- Ag láithriú thar ceann an Stiúrthóra Ionchúiseamh Poiblí sna Cúirteanna Dúiche de Dhúiche Chathrach Bhaile Átha Cliath agus in achomhairc uathu chuig an gCúirt Chuarda. Tá ról forleathan abhcóideachta i gceist san obair sin. Áirítear san obair sa réimse seo na Leabhair Fianaise a ullmhú le haghaidh trialacha sna cúirteanna i mBaile Átha Cliath.
- Ag gníomhú mar aturnae don Stiúrthóir Ionchúiseamh Poiblí i ngach athbhreithniú breithiúnach, in iarratais habeas corpus, i gcásanna sonraithe, in iarratais ar bhannaí etc. sna huaschúirteanna, i gcás an Stiúrthóir Ionchúiseamh Poiblí a bheith ina pháirtí iontu.

- 2.13 Tá Rannán na nAturnaetha roinnte ina cheithre rannóg oibríochta:

- Rannóg na Cúirte Dúiche
- Rannóg na dTrialacha Cúirte Chuarda
- Rannóg na nAthbhreithnithe Breithiúnacha
- Rannóg na nUaschúirteanna

Tá Rannóg na nUaschúirteanna freagrach as cásanna sa Phríomh-Chúirt Choiriúil agus sa Chúirt Choiriúil Speisialta agus as leabhair fianaise agus obair trialach a ullmhú i ndáil le coireacht chorparáideach, le dlí iomaíochta agus le calaois chasta lena n-áirítear ionchúiseamh maidir le sciúradh airgid. Tá an fheidhm sin is déanaí atá luaite ann chun déileáil le méadú a mheastar a bheith ann i dtaca le hionchúisimh i réimsí den sórt sin, ag féachaint do reachtaíocht a tugadh isteach le déanaí agus do róil an Údaráis Iomaíochta agus Oifig an Stiúrthóra um Fhorfheidhmiú Corparáideach. Tá leagan amach na rannán laistigh d’Oifig an Stiúrthóra Ionchúiseamh Poiblí le feiceáil sna cairt eagrúcháin ar leathnech 53 den Tuarascáil seo.

- 2.14 Déileálann an Príomh-Aturnae Ionchúisimh le gnó uile an Stiúrthóra Ionchúiseamh Poiblí laistigh de

limistéar Bhaile Átha Cliath. Lasmuigh de Bhaile Átha Cliath, déileálann 32 aturnaí stáit áitiúil le gnó ionchúisimh ar bhonn conartha leis an Stát. Rinneadh moladh sa Tuarascáil ón nGrúpa Staidéir ar an gCóras Ionchúiseamh Poiblí go ndéanfaí an tseirbhís Aturnaetha Stáit a aistriú ón Ard-Aighne chuig an Stiúrthóir Ionchúiseamh Poiblí. Tá an t-aistriú sin ag brath ar reachtaíocht atá á dréachtú faoi láthair. Tar éis an t-aistriú a chur i gcrích, áfach, beidh an Príomhathar nae Ionchúisimh freagrach as riaradh ionchúiseamh ar fud na tíre.

- 2.15 Mar atá luaite thuas, bíonn dlúthchaidreamh oibre ann idir an Rannán agus an Garda Síochána agus sainghníomhaireachtaí imscrúdúcháin eile. Ina theannta sin, ag an leibhéal oibríochta, bíonn ionchúiseamh éifeachtach i leith cionta ag brath ar dlúthchomhar le páirtithe leasmhara eile sa chóras ceartais choiriúil e.g. an tSeirbhís Chúirteanna, finnéithe sainoilte, comhaltaí den Bharra agus ionadaithe de chuid íospartach.

AN RANNÁN RIARACHÁIN

- 2.16 Soláthraíonn an Rannán Riaracháin na seirbhísí eagrúcháin, bonneagair, riaracháin agus faisnéise atá ag teastáil ón Oifig agus, freisin, soláthraíonn sé tacaíocht don Rannán Stiúrtha agus do Rannán na nAturnaetha araon.
- 2.17 Cuid lárnach de ról an Rannáin Riaracháin is ea cur i bhfeidhm chlár nuachóirithe na státseirbhíse, rud a bhí fíorthábhachtach i dtaca le forbairt na hOifige le blianta beaga anuas. Tá tuairisc mhion ar an dul chun cinn maidir le gnéithe éagsúla den chlár leagtha amach i gCaibidil 3.

CUID II

ATHBHREITHNIÚ AR AN mBLIAIN

An Clár Nuachóirithe

- 3.1 D'ainneoin dúshláin a bheith ann le linn clár nuachóirithe na státseirbhíse a chur i bhfeidhm, bhí tionchar dearfach aige ar fhorbairt Oifig an Stiúrthóra Ionchúiseamh Poiblí. Le linn na bliana 2003, caitheadh roinnt mhaith ama agus rinneadh iarrachtaí móra chun cur leis an obair a bhí déanta i mblianta roimhe sin.
- 3.2 Is é is mó a ndírítear air i dtaca leis an gclár nuachóirithe ná bainistiú straitéiseach a dhéanamh ar obair lárnach na hOifige – is é sin, ionchúiseamh a dhéanamh i leith coireanna. I dTuarascálacha Bliantúla roimhe seo, tarraingíodh aird ar an am atá caite ar fhorbairt Ráiteas Straitéise agus Pleananna Gnó. Lean an Oifig de bheith ag díriú ar bhainistíocht straitéiseach le linn na bliana 2003. I rith na bliana, rinneadh Ráiteas Straitéise nua a fhorbairt do na blianta 2004 – 2006. Nuair a bhí an doiciméad sin á ullmhú baineadh leas mór as obair ar cuireadh tús léi sa bhliain 2002 agus a críochnaíodh sa bhliain 2003 faoin gCreat Faisnéise Bainistíochta.
- 3.3 Mar a tuairiscíodh i dTuarascáil Bhliantúil 2002, fostaíodh sainchomhairleoirí sa bhliain 2002 chun cabhair a thabhairt maidir le riachtanais faisnéise na hOifige faoi Chéim 1 den Chreat Faisnéise Bainistíochta a shainaithint. Is é is cuspóir do Chreat Faisnéise Bainistíochta ná faisnéis iomchuí thráthúil bhainistíochta, idir fhaisnéis airgeadais agus faisnéis neamh-airgeadais, a sholáthar do bhainisteoirí d'fhonn tacú leo le linn cinntí a dhéanamh. Tar éis dian-anailís a dhéanamh ar fheidhmeanna agus ar fhreagrachtaí na hOifige, ullmhaíodh tuarascáil chuimsitheach sa bhliain 2003. Sa tuarascáil sin, leagadh amach go mion an fhaisnéis a bheadh ag teastáil chun obair na hOifige a bhainistiú go héifeachtach. Bhí achoimre ann freisin ar na bearta a bheadh ag teastáil chun forbairt a dhéanamh ar na córais Teicneolaíochta Eolais ba ghá chun an fhaisnéis bhainistíochta sin a sholáthar.
- 3.4 Rinneadh trí phríomhearnáil faisnéise a shainaithint sa Tuarascáil Creat Faisnéise Bainistíochta. Baineann na hearnálacha sin le hobair dhlíthiúil na hOifige, le hidirbhearta airgeadais na hOifige agus leis na hacmhainní daonna atá ar fáil don Oifig.
- 3.5 Leis an Tuarascáil Creat Faisnéise Bainistíochta, sainithníodh go ndéanfaí soláthar na faisnéise thuas a sholáthar ó thrí chóras Eolais Teicneolaíochta ar leithligh, is é sin le rá, córas bainistithe cásanna dlíthiúla, córas bainistithe airgeadais agus córas bainistithe acmhainní daonna.
- 3.6 Mar a tuairiscíodh i dTuarascáil Bhliantúil 2002, rinneadh Córas Bainistithe Acmhainní Daonna nua na státseirbhíse a chur i bhfeidhm i mí na Nollag 2002. Rinneadh an córas sin a fhorbairt tuilleadh le linn na bliana 2003 agus, anois, soláthraítear réimse cuimsitheach faisnéise bainistíochta leis i dtaca le hacmhainní daonna na hOifige.
- 3.7 Go stairiúil, is é an Roinn Airgeadais a chuir seirbhísí cuntasaíochta ar fáil d'Oifig an Stiúrthóra Ionchúiseamh Poiblí. Mar chuid d'fhorbairt Creat Faisnéise Bainistíochta ar fud na státseirbhíse, áfach, cinneadh go ndéanfaí freagracht as soláthar na seirbhíse sin a aistriú chuig an Oifig seo. Le linn na bliana 2003, rinne an Oifig córas airgeadais a shonrú agus a roghnú, ar córas é lena ndéanfaí, i measc nithe eile, na riachtanais a sainithníodh i dTuarascáil Creat Faisnéise Bainistíochta a sholáthar i ndáil le tuairiscíú airgeadais, cuntasaíocht bhainistíochta agus leithroinnt costais.
- 3.8 Rinneadh an próiseas roghnaithe don chóras airgeadais a thabhairt i gcrích i Meán Fómhair 2003. Cuireadh tús le suiteáil agus tástáil an chórais, ar bhonn céimnithe, i mí Dheireadh Fómhair. Bhí na modúil thábhachtacha den phacáiste nua airgeadais i bhfeidhm faoi mhí na Nollag 2003, rud a d'fhág go rabhthas réidh chun tús a chur le feidhmiú 'beo' an chórais ar an 1

Eanáir 2004. Áirítear sna modúil sin modúl an mhórleabhair ainmniúil agus modúl an mhórleabhair ceannachán. Is é an spriocdháta chun an tionscadal seo a chríochnú ná Meán Fómhair 2004. Táthar ag súil go gcríochnófar an obair roimh an dáta sin.

- 3.9 Maidir le soláthar an tríú hearnáil faisnéise a sainathnódh sa Tuarascáil Creat Faisnéise Bainistíochta, is é sin le rá, an ceann a bhaineann le bainistiú obair dhlíthiúil na hOifige, is dúshlán níos mó é ná mar atá i gceist le ceachtar den dá earnáil eile. Is amhlaidh atá mar go bhfuil méid an tionscadail i bhfad níos mó ná na cinn eile. Beidh gá le forbairt a dhéanamh ar chóras nua Teicneolaíochta Faisnéise chun bainistiú a dhéanamh ní amháin ar obair thraidisiúnta dhlíthiúil na hOifige ach freisin ar na freagrachtaí breise atá ar an Oifig mar gheall ar aistriú fheidhmeanna ionchúisimh choiriúil an Phríomh-Aturnae Stáit agus aistriú beartaithe na freagrachta i leith Sheirbhís na nAturnaetha Stáit. Tugadh tuairisc roimhe seo ar aistriú na bhfreagrachtaí sin sna Tuarascálacha Bliantúla do na blianta 2001 agus 2002.
- 3.10 Le linn na bliana 2003, mar chuid den forbairt ar ár Straitéis fhoriomlán Teicneolaíochta Eolais do na trí bliana atá romhainn, rinneadh cinneadh sainchomhairleoirí a fhostú chun cabhair a thabhairt maidir le riachtanais mhionsonraithe a shainaithint i ndáil le córas nua bainistithe cásanna dlíthiúla. Fuarthas maoiniú ina leith sin agus cuireadh tús leis an tionscadal. Táthar ag súil go ndéanfar an próiseas sonraíochta agus roghnaithe i dtaca leis an gcóras nua bainistithe cásanna dlíthiúla a chur i gcrích sa bhliain 2004 agus go gcuirfeadh tús le forbairt an chórais Teicneolaíochta Eolais i dtús na bliana 2005 agus go mbeidh an obair críochnaithe i lár na bliana 2005.
- 3.11 Is é forbairt an chórais nua bainistithe cásanna dlíthiúla an tionscadal Teicneolaíochta Eolais is mó dár tugadh faoi riamh san Oifig. Tar éis é a chur ar fáil go rathúil beidh sé ina chabhair an-

mhór maidir le soláthar na faisnéise bainistíochta atá ag teastáil chun cúraimí méadaithe na hOifige a bhainistiú go héifeachtach. Fuarthas maoiniú chun tús a chur leis an tionscadal seo agus tá comharthaí dearfacha ann maidir leis an maoiniú riachtanach a bheith ar fáil chun an tionscadal a thabhairt chun críche.

- 3.12 Léiríonn Ráiteas Straitéise 2004 – 2006 go mbeidh gnóthú na gcuspóirí atá leagtha amach don tréimhse 2004 – 2006 ag brath ar fhorbairt na gcóras Teicneolaíochta Eolais mar a sainathnódh i dTuarascáil Creat Faisnéise Bainistíochta. Déanfar tuairisc ar an dul chun cinn maidir le forbairt na gcóras sin a thabhairt arís i dTuarascáil Bhliantúil 2004.

Seirbhísí Leabharlainne

- 3.13 Rinneadh an chéad chéim den chóras bainistithe leabharlainne a thabhairt i gcrích sa bhliain 2003. Lainseáladh an chatalóg iLink i mí Bhealtaine 2003 agus tugann sé sin rochtain ar bhailiúcháin na leabharlainne, ar chuntais phearsanta leabharlainne agus ar an tsraith iomlán acmhainní leictreoinacha atá againn. Tá ‘mear-naisc’ ann leis na breithiúnais is déanaí, le teoracha inmheánacha agus le liostaí leabhar nua. Rinneadh na Bailiúcháin Dhigiteacha trí iLink i mí na Nollag 2003 nuair a cuireadh bailiúchán píolóta ar fáil ina bhfuil breithiúnais chúirte neamhthuiriscithe don tréimhse 1998-2003, ciorcláin de chuid an Gharda Síochána don tréimhse 1995-2001 agus teoracha agus tuairimí inmheánacha áirithe.
- 3.14 Ó tharla go bhfuil an dá chóras sin comhtháite, is féidir le húsáidí na doiciméid atá sna bailiúcháin dhigiteacha a léamh, agus cuardach a dhéanamh iontu, ag a mboird féin; tá “luach breise” ann sa mhéid go bhfuil innéacs ar fáil acu. De thoradh na córais nua leabharlainne a bheith ann, tá rochtain ag an bhfoireann anois ar na hacmhainní leabharlainne go léir ó aon chomhéadan amháin.

Acmhainní Daonna

- 3.15 I rith na bliana, d'éirigh le caibidlí a bhí ann maidir le linn chomhchoitinn ardaithe céime a chruthú do Rannán na nAturnaetha in Oifig an Stiúrthóra Ionchúiseamh Poiblí agus d'Oifig an Phríomh-Aturnae Stáit. De thoradh an chomhaontaithe beidh níos mó deiseanna gairmréime ann d'aturnaetha agus don fhoireann theicniúil dlí sa dá Oifig. Is é a leanfaidh as freisin ná linn níos mó iarrthóirí agus iomaíocht níos mó nuair atá poist ardaithe céime á líonadh sa dá eagraíocht.
- 3.16 I rith na bliana, cuireadh tús le caibidlí maidir le linn chomhchoitinn ardaithe céime a chruthú don dá rannán dhlíthiúla den Oifig seo. Bheadh buntáistí linne comhchoitinne den sórt sin comhchosúil leo sin a thuairiscítear sa mhír sin roimhe seo. Is é an príomhdheacracht a saináithníodh i ndáil le linn chomhchoitinn a chur ar bun idir an dá rannán dhlíthiúla san Oifig seo ná, de réir mar atá cúrsaí faoi láthair, nach bhféadfaí abhcóidí as an Rannán Stiúrtha a shannadh chun bheith ag obair i Rannán na nAturnaetha. Ó tharla gurb é an traidisiún aturnaetha agus abhcóidí a fhostú chun feidhmeanna stiúrtha na hOifige a chomhlíonadh ní bheadh aon deacracht ann maidir le haturnaetha a aistriú ó Rannán na nAturnaetha go dtí an Rannán Stiúrtha. Tá breithniú á dhéanamh lena fháil amach an bhféadfaí athrú reachtaíochta a lorg chun déileáil leis an ábhar seo.
- 3.17 I mí na Samhna 2003 bunaíodh foghrúpa de Choiste Comhpháirtíochta na hOifige chun Straitéis Acmhainní Daonna a fhorbairt don Oifig. Beidh ról lárnach ag an Straitéis i dtaca le forbairt an dhéanamh ar pholasaithe Acmhainní Daonna don Oifig don tréimhse 2004 – 2006.
- 3.18 I gcomhréir le tiomantas na hOifige i leith cóimheá a chur chun cinn idir saol na hoibre agus saol an teaghlaigh, cuireadh polasaithe a bhí dírithe air sin chun cinn i rith na bliana agus bhí Lá na Teaghlaigh ann i Márta 2003.

- 3.19 Tar éis an Córas Bainistithe Feidhmíochta agus Forbartha a thabhairt isteach tá béim níos mó ar oiliúint agus forbairt na foirne. Déanann an tAonad Oiliúna measúnú ar iarrataí a luaitear i bpleananna oiliúna agus forbartha pearsanta na foirne agus eagraítear oiliúint oiriúnach ar bhonn leanúnach. I rith na bliana 2003, chaith an Oifig 4.6% de na costais phá-rolla ar oiliúint agus ar fhorbairt na foirne. Áirítear sa chaiteachas sin €65,413 ar sheimineáir, ar chomhdhálacha agus ar chúrsaí; €17,000 ar oiliúint Teicneolaíochta Eolais; agus €30,000 ar an scéim aisíoca táillí.

Seirbhís Ardchaighdeáin

- 3.20 Chun aitheantas a thabhairt don ghá le comhairle a ghlacadh ar bhonn leanúnach leo sin dá soláthraímid seirbhís, d'eagraigh an Oifig roinnt comhdhálacha arís rud a chuir fóram ar fáil chun smaointe a phlé agus a mhalartú i measc daoine a bhfuil baint acu leis an gcóras ceartais choiriúil, ag an leibhéal náisiúnta agus ag leibhéal Eorpach araon.
- 3.21 I mí Eanáir 2003, tionóladh ár Seimineár Bliantúil Aturnaetha Stáit i nDlí-Chumann na hÉireann. Daoine a oibríonn sa tSeirbhís Aturnaetha Stáit a d'fhreastail ar an seimineár sin. Thug an Dr. Louise McKenna, Leas-Stiúrthóir na Saotharlainne Dlí-Eolaíochta, léiriú ar fhorbairt sa tSaotharlann Dlí-Eolaíochta agus thug Francis H. Cassidy, Ceann Rannóg na nUaschúirteanna in Oifig an Stiúrthóra Ionchúiseamh Poiblí, achoimre ar an bpróiseas reachtaíochta a ghabhann le hurghabháil fáltas coireachta in Éirinn.
- 3.22 Tionóladh ár 4th Comhdháil Bhliantúil d'Ionchúisitheoirí Náisiúnta i mí Bhealtaine 2003 i gCaisleán Bhaile Átha Cliath agus d'fhreastail os cionn 200 toscaire uirthi; bhí baint ag gach duine díobh sin le hionchúiseamh a dhéanamh i leith coireanna. Bhí ábhair éagsúla díospóireachta, seachas aon téama amháin, ar an gclár don chomhdháil. Áirítear an méid seo a leanas i measc na n-ábhar sin: caomhnú fianaise le

- George Birmingham, SC; feidhm na heolaíochta leis an Uas. John McCullough, An Rannóg Cheimice, an tSaotharlann Dlí-Eolaíochta; an Chúirt Choiriúil Idirnáisiúnta leis an mBreitheamh Maureen Harding Clark, an Chúirt Choiriúil Idirnáisiúnta; agus taighde ar ghiúiréithe leis an Dr. Penny Darbyshire as Scoil Dlí Kingston sa Ríocht Aontaithe.
- 3.23 I mbliana, ghníomhaigh an Oifig mar chomh-óstach, i gcomhar le hIonad na hÉireann do Dhlí na hEorpa agus le hAcadamh Dhlí na hEorpa in Trier, le linn comhdhála ar Thionchar Dhlí an Aontais Eorpaigh ar Dhlí Coiriúil Náisiúnta agus ar Chleachtas ina leith. Tionóladh an chomhdháil i Meitheamh 2003 agus bhí 70 toscaire as áiteanna ar fud na hEorpa i láthair. Ba é cuspóir na comhdhála ná athbhreithniú a dhéanamh ar fhorbairt an chomhoibríthe ag leibhéal an Aontais Eorpaigh in ábhair a bhaineann le dlí coiriúil. I measc na n-ábhar spéisiúil a pléadh le linn na comhdhála áirítear bearta an Aontais Eorpaigh i ndáil leis an gcomhrac i gcoinne sceimhlitheoireachta; coireacht idirlín a chomhrac; creatchinneadh ar an mBarántas Gabhála Eorpach; agus ról Chúirt Bheithiúnais na hEorpa agus na gCúirteanna Breithiúnais Náisiúnta in ábhair cheartais choiriúil de chuid an Aontais Eorpaigh. Thug an tUas. Micheál Mac Dubhghaill, TD, Aire Dlí agus Cirt, Comhionannais agus Athchóirithe Dlí, agus an Coimisinéir David Byrne, an Coimisiún Eorpach, conclúidí na comhdhála.
- 3.24 Ar mhaithe leis an oiread faisnéise faoi obair Oifig an Stiúrthóra Ionchúiseamh Poiblí agus is féidir a sholáthar don phobal i gcoitinne, d'fhoilsigh an Oifig dhá threoir faisnéise i Meán Fómhair 2003, is é sin le rá, 'Ról an Stiúrthóra Ionchúiseamh Poiblí' agus 'Ag Freastal sa Chúirt mar Fhinné'. Tá na leabhráin leagtha amach i bhformáid 'ceisteanna a chuirtear go minic' agus foilsíodh iad i gcaint shoiléir tar éis comhairle a fháil ón National Adult Literacy Agency. Chuathas i gcomhairle le Victim Support freisin maidir le codanna áirithe de na leabhráin ar díol spéise iad d'íospartaigh coireachta. Ón tráth a foilsíodh iad, scaipeadh tuairim is 30,000 cóip de na leabhráin ar fud na tíre trí oifigí ar nós Victim Support; ionaid faisnéise do shaoránaigh, leabharlanna, ionaid Ghéarchéime Éignithe, oifigí cúirte agus Stáisiúin an Gharda Síochána. Tá na leabhráin ar fáil freisin ar ár láithreán gréasáin ag www.dppireland.ie.
- 3.25 Foinse eile faisnéise faoi Oifig an Stiúrthóra Ionchúiseamh Poiblí is ea ár láithreán gréasáin. Rinneadh an láithreán a athdhearadh agus a lainseáil i mí na Nollag 2003. Ar mhaithe le tuiscint níos fearr ar obair na hOifige a chothú tá roinnt gnéithe nua curtha isteach sa láithreán gréasáin lena n-áirítear roinn ceisteanna agus freagraí; sonraí teagmhála le haghaidh aturnaetha stáit áitiúla; cairt eagrúcháin; leathanach gairmréime; agus foirm le haghaidh tuairimí agus aiseolais ó chuirteoirí ar an láithreán. Comhlíonann an láithreán gréasáin caighdeán *WAI Level II* agus, chomh maith leis sin, tá sé dátheangach. Leanfaimid de bheith ag athbhreithniú agus ag measúnú an láithreáin trí fhaireachán a dhéanamh ar thrácht gréasáin agus trí leas a bhaint as foirmeacha aiseolais comhlánaithe.
- Comhpháirtíocht**
- 3.26 I rith na bliana 2003, rinneadh forbairt shuntasach ar phróiseas na comhpháirtíochta in Oifig an Stiúrthóra Ionchúiseamh Poiblí. Le fírinne, bhí an cur chuige comhpháirtíochta maidir le saincheisteanna eagrúcháin a scrúdú an-tairfeach don Oifig.
- 3.27 Chuathas i gcomhairle leis an gcoiste comhpháirtíochta i ndáil le nithe ar nós chur i bhfeidhm an Chórais Bainistíochta Feidhmíochta agus Forbartha; ullmhú tuarascálacha dul chun cinn do Ghrúpa Fíoraithe Feidhmíochta na Státseirbhíse; dréachtú polasaí ríomhphoist don Oifig; agus tabhairt isteach an choisc ar chaitheamh tobac.

3.28 Bhí foghrúpaí de chuid an choiste freagrach as taighde a dhéanamh agus tuairisc a thabhairt ar fhadú uaireanta oibre solúbtha chuig an bhfoireann riaracháin agus chuig an bhfoireann dhlíthiúil araon; ar chur i bhfeidhm scéim na ngradam tuillteanaís; agus ar ullmhú polasaí i gcoinne maistíneachta agus ciapála.

3.29 Rinneadh athbhreithniú ar an bpróiseas comhpháirtíochta i rith na bliana freisin agus, de thoradh ar mholtaí a rinneadh, cuireadh deich bhfoghrúpa de chuid an choiste comhpháirtíochta ar bun i mí na Samhna 2003 chun scrúdú a dhéanamh ar shaincheisteanna éagsúla lena n-áirítear cumarsáid; seirbhís ardchaighdeáin; saincheisteanna maidir le cúrsaí timpeallachta; cur chun cinn na Gaeilge; sláinte agus sábháilteacht; agus straitéisí acmhainní daonna. Beidh bunú na bhfoghrúpaí sin ina chabhair maidir leis na próisis faisnéise agus déanta cinntí a mhéid a bhaineann le nithe éagsúla a fhearann ar an ionad oibre agus tabharfaidh sé deis do dhaoine den fhoireann, ag gach leibhéal den eagraíocht, chun bheith páirteach sa phróiseas athraithe agus nuachóirithe.

3.30 Faoi dheireadh na bliana 2003, bhí 49% san iomlán den fhoireann tar éis páirt ghníomhach a ghlacadh sa phróiseas comhpháirtíochta ar bhealach éigin. Áirítear i measc na ndaoine sin iad sin a d'fhóin ar an gcoiste comhpháirtíochta, iad sin a d'fhreastail ar chruinnithe mar chuairoteoirí agus iad sin a raibh baint acu le foghrúpaí comhpháirtíochta. Is Cuma cén tslat tomhais a úsáidtear, is leibhéal páirteachais iontach é sin.

Conclúid

3.31 De thoradh ar na forbairtí eagrúcháin sin roimhe seo tháinig fórfheabhas, i rith na bliana 2003, ar chaighdeán na seirbhíse a sholáthraíonn an Oifig agus tá dúshraith leagtha síos le haghaidh tuilleadh feabhsúcháin amach anseo. Ina theannta sin, chabhraigh na forbairtí sin go mór i dtaca le gnóthú mhisean foriomlán na hOifige, is é sin le rá, *seirbhís ionchúisimh atá neamhspleách, cóir agus éifeachtach a chur ar fáil thar ceann Mhuintir na hÉireann.*

CUID III
FORBAIRTÍ DLÍTHIÚLA

CAIBIDIL 4

CINNÍ DLÍTHIÚLA

RÉAMHRÁ

- 4.1 Is é is cuspóir don chaibidil seo ná tuairisc ghearr a thabhairt ar chuid de na cinntí is tábhachtaí nó is spéisiúla dár tugadh i gcásanna dlíthiúla coiriúla i rith na bliana 2003.
- 4.2 Roghnaíodh na cásanna chun bhlaiseadh a thabhairt ar an gcineál saincheisteanna dlíthiúla a éiríonn i dtrialacha coiriúla. Níl an chaibidil ceaptha chun athbhreithniú cuimsitheach a thabhairt ar na forbairtí go léir a tharla i dtaca leis an dlí coiriúil i rith na bliana. Aon léitheoirí ar díol spéise dóibh athbhreithniú den sórt sin, is ceart dóibh athbhreithniú bliantúil ar dhlí na hÉireann don bhliain 2003, le Binchy agus Byrne, a léamh.

MOILL

- 4.3 Leanann moill de bheith ina saincheist bheo i gcuid mhór ionchúiseamh coiriúil. D'fhéadfadh sé tarlú, mar gheall ar imeacht aimsire idir cion a dhéanamh agus cion a ionchúiseamh, go mbeidh baol ann, ar chúiseanna éagsúla, go dtarlóidh triail éagórach. D'fhéadfadh sé go mbeidh finnéithe marbh, nach mbeidh siad in ann fianaise a thabhairt mar gheall ar sheanaois nó mar gheall ar thinneas; nó nach mbeidh siad in ann cuimhneamh ar an ócáid atá i gceist. D'fhéadfadh sé tarlú nach bhfuil an cosantóir in ann fianaise a d'fhéadfadh cabhrú le cás na cosanta a fháil, mar shampla, tacaíocht le haghaidh alibi. Seo a leanas cuid de na cinntí is suntasaí:
- 4.4 In *Director of Public Prosecutions v. P.O'C.* Court of Criminal Appeal (unreported, 26 January 2003), dúirt an chúirt gur ceart don chosantóir, i gcás inar dóigh leis nach bhfaighidh sé triail chóir, a iarraidh ar an Ard-Chúirt stad a chur le seoladh an ionchúisimh seachas an t-ábhar a ardú i gcúirt na trialach.
- 4.5 Tháinig moill ar thaobh an údaráis ionchúisimh, seachas ar thaobh gearánaigh, chun cinn in *The Minister for Social, Community and Family Affairs*

v. Orla Lawlor High Court (unreported, 17 February 2003). Líomhnaíodh go ndearna an cúisí uirill bhréige d'fhonn cúnamh difhostaíochta a fháil. Dúirt an chúirt nach mór do chúisí dhá thástáil a shásamh i ndáil le moill: (1) Ar dtús, an bhfaighidh an cosantóir triail éagórach mar gheall ar an moill? (2) Ina dhiaidh sin, an bhfuil an mhoill chomh huafásach sin, gur ceart cosc a chur ar an ionchúiseamh leanúint ar aghaidh, bíodh an triail cóir nó éagórach?

- 4.6 Rinneadh breithniú ar mhoill ar thaobh an ionchúisimh arís in *James M. Barry v. Director of Public Prosecutions and Others* Supreme Court (unreported, 17 December 2003). Le linn diúltú stad a chur leis an triail, ó tharla go raibh os cionn 600 gearán ann i gcoinne an Dr Barry, ghlac an chúirt leis go mbeadh moill dhosheachanta ann i ndáil le próiseáil na ngearán, i ndáil leis an imscrúdú a chríochnú agus i ndáil leis an ionchúiseamh a thionscnamh. Bhí sé intuigthe, á chur san áireamh gur bhain na líomhaintí le hiompar i gcomhthéacs an chaidrimh idir an dochtóir agus a chuid othar, nach mbeadh gearán déanta ag na híospartaigh tráth níos luaithe ná mar a tharla.
- 4.7 Bíonn tionchar ag moill freisin ar ghearradh pianbhreitheanna. In *Director of Public Prosecutions v. R.B.* Court of Criminal Appeal (unreported, 12 February 2003), ciontaíodh an cúisí in dhá scór lánúnais chollaí i leith cailín óig, ar scórtha iad a tharla tamall measartha fada roimhe sin. Chinn an chúirt, i gcás moill fhada a bheith ann idir an cion a dhéanamh agus an triail a sheoladh, go bhfuil roinnt nithe ann ar chóir iad a bhreithniú le linn pianbhreith a ghearradh lena n-áirítear iompar an duine lena mbaineann san idirthréimhse, teagmhais iomchuí i saol an chiontóra san idirlinn (sa chás seo, bhí tinneas tromchúiseach ann), iarmhairt dhochrach na droch-úsáide ar an íospartach, an raibh ciontuithe comhchosúla ann ina dhiaidh sin nó arbh ionann na cionta agus cuid de phátrún, agus athinmheachan an chiontóra.

TIOMÁINT FAOI THIONCHAR ÓIL

Alcóladán

- 4.8 Is é atá san alcóladán ná feiste a úsáideann na Gardaí chun tomhas a dhéanamh ar an leibhéal alcóil i dtiománaí agus leas á bhaint as sampla d'anáil an duine. Má ólann tiománaí alcól díreach roimh shampla a thabhairt, d'fhéadfadh sé sin fearadh ar an toradh. Mar gheall air sin, is é a dhéantar de ghnáth ná fanacht fiche nóiméad tar éis duine a ghabháil agus, ansin, a iarraidh ar an tiománaí séideadh isteach san alcóladán. In *Director of Public Prosecutions v. Marie Quirke* High Court (unreported, 3 March 2003), Dúirt an Breitheamh Uas. Ó Caoimh nach gá don Garda fanacht chun an triail alcóladáin a dhéanamh mura rud é go gceapann sé gur ól an duine atá faoi dhrochamhras alcól laistigh den fiche nóiméad roimhe sin. Cé go bhféadfadh an Garda a fhiafraí den chúisí cén uair a d'ól sí deoch mheisciúil den uair is déanaí ní bheadh uirthi an cheist a fhreagairt (agus d'fhéadfadh aon fhreagra a thabharfadh sí a bheith bréagach). Ba é an rud tábhachtach ná an tuairim ar tháinig an Garda uirthi, seachas iontaofacht an alcóladáin.
- 4.9 In *Director of Public Prosecutions v. Patricia Behan* High Court (unreported, 3 March 2003), cúisíodh an cúisí i mainneachtain sampla anála a thabhairt, contrártha d'alt 13 den Acht um Thrácht ar Bhóithre, 1994. Fiafraíodh den gcúirt cad iad na cosaint a bhí ar fáil agus cén ghné mheabhrach a bhí i gceist faoin alt sin. D'fhreagair an chúirt nach ionann an tiománaí a bheith mearbhlach nó trína chéile agus leithscéal chun diúltú sampla a thabhairt.

FIANAISE

Fianaise Chomhchoirí

- 4.10 Is é atá i gcomhchoirí ná duine a chabhraíonn le duine eile coir a dhéanamh nó a chabhraíonn leis éalú agus ionchúiseamh a sheachaint. Bíonn na

cúirteanna faicheallach maidir le glacadh le fianaise ó chomhchoirí mar go bhféadfadh claonadh a bheith i gcomhchoirí an milleán a fhágáil ar dhuine eile go héagórach, sin nó áibhéil a dhéanamh i leith bhaint an duine eile leis an ábhar, d'fhonn a fhreagracht féin a íoslaghdú. Dá thoradh sin, iarrann na cúirteanna comhthacaíocht le fianaise chomhchoirí. Is ionann comhthacaíocht agus fianaise neamhspleách lena ndaingnítear an fhianaise atá á tabhairt ag an gcomhchoirí. In *The People (Director of Public Prosecutions) v. John Gilligan* Court of Criminal Appeal (unreported, 8 August 2003), dúirt an chúirt nach raibh sé riachtanach go dtabharfadh an breitheamh rabhadh don ghiúiré ina leith an ábhair seo. Chinn an chúirt gur leor do chúirt na trialach comhthacaíocht a iarraidh le fianaise chomhchoirí trí fhianaise imthoisceach nó fianaise neamhspleách a fháil. Is é tasc chúirt na trialach ná aitheantas a thabhairt don bhaol a ghabhann le glacadh le fianaise chomhchoirí agus gníomhú ar shlí ina dtugtar cosaint ar bhaol den sórt sin ionas go bhféadfaí glacadh, le réasún, le fianaise ó chomhchoirí.

Fianaise a Choimeád

- 4.11 Le linn imscrúdú a dhéanamh maidir le coir, ní mór do na Gardaí an fhianaise go léir a lorg seachas an fhianaise sin amháin lena dtaispeántar go bhfuil duine atá faoi dhrochamhras ciontach. Ní mór dóibh, i gcoitinne, an fhianaise go léir a bhailítear a thaispeáint don duine atá faoi dhrochamhras. De ghnáth, ní féidir leo míreanna fianaise a d'fhéadfadh a bheith fóinteach don duine atá faoi dhrochamhras a dhiúscairt gan deis a thabhairt, roimh ré, iad a iniúchadh. Is minic a tharlaíonn sé go bhféadfadh feithicil ghoidte a bheith ina mír fianaise i gcás áirithe. Tá sé tábhachtach, ar ndóigh, go dtabharfaí ar ais dá húinéir í a luaithe is féidir.

4.12 Tá roinnt cásanna ann inar déileáladh leis an tsaincheist a bhaineann le coimeád fianaise: *James Bowes and Deirdre McGrath v. Director of Public Prosecutions* [2003] 2 IR 25 Supreme Court; *Gavin McKeown v. the Judges of the Dublin Circuit Court and the Director of Public Prosecutions* Supreme Court (unreported, 9 April 2003); agus *Ian Connolly v. Director of Public Prosecutions and the Judges of the Metropolitan District Court* High Court (unreported, 15 May 2003). I gcás amháin díobh, theastaigh ó dhuine a bhí cúisithe i dtiomáint chontúirteach gluaisrothar a bhí bainteach leis an imbhuailtú ach bhíodhas tar éis é a dhiúscairt cheana féin. Sna trí chás eile, theastaigh na daoine a raibh drochamhras ann ina leith na gluaisrothar inar gabhadh iad a scrúdú. Rialaigh an chúirt i bhfabhar duine amháin díobh sin agus i gcoinne na ndaoine eile. Ag éirí as na cinní sin, is féidir na conclúidí seo a leanas a dhéanamh:

- Ní mór na hoibleagáidí atá ar na Gardaí a léiriú go réadúil agus go praiticiúil agus i ndáil le fianaise atá riachtanach.
- Ní mór don chúisí a thaispeáint go mbeadh an triail éagórach gan an fhianaise a bheith ann.
- Is é cúram na nGardaí, go príomha, imscrúdú a sheoladh agus ní mór dóibh rogha a fheidhmiú i ndáil le fiafraithe a dhéanamh.
- Ní mór don duine atá faoi dhrochamhras iarraidh a dhéanamh laistigh de thréimhse réasúnach má theastaíonn uaidh nó uaithe míreanna áirithe a fheiceáil.

Cumhachtaí chun Duine a Ghabháil ar Mhaoin Phríobháideach

4.13 In *Director of Public Prosecutions v. Bernard O'Rourke* High Court (unreported, 17 February 2003) bhí drochamhras ar na Gardaí faoi thiománaí i ndáil tiomáint chontúirteach agus lean siad an tiománaí isteach i maoin phríobháideach. Gabhadh an tiománaí ar an maoin sin ach níor leis an mhaoin. Rialaigh an

breitheamh den Chúirt Dúiche go raibh an nós imeachta neamhbhailí mar go raibh foghail déanta ag na Gardaí. D'éasaontaigh an Ard-Chúirt. Rinneadh an cion in áit phoiblí. Bhí na Gardaí i dteideal dul isteach i maoin phríobháideach nár leis an tiománaí í chun an tiománaí a ghabháil. Bhí údarás intuigthe ann, arna thabhairt ag cinn teaghlaigh do na Gardaí, le go bhféadfadh an Gardaí dul isteach i gcabhsa nó i ngairdín a maoine chun an dlí a fhorfheidhmiú agus níor tugadh aon fhianaise go ndearnadh an cuireadh intuigthe a tharraingt siar sa chás lena mbaineann.

4.14 Faoi alt 39(2) den Acht um Thrácht ar Bhóithre, 1994, is féidir leis na Gardaí dul isteach i maoin phríobháideach, lena n-áirítear cabhsa tí, ach ní isteach sa teach féin, d'fhonn duine a ghabháil i leith tiomáint faoi thionchar óil. Ní mór dóibh cinneadh a bheith déanta acu, roimh ré agus ar fhorais chúí, chun an ghabháil a dhéanamh.

4.15 In *Director of Public Prosecutions v. Alan Molloy* Supreme Court (unreported, 28 February 2003) lean na Gardaí tiománaí isteach ina chabhsa féin agus drochamhras orthu ina leith go raibh sé ag tiomáint faoi thionchar óil. D'ordaigh an tiománaí do na Gardaí imeacht as an gcabhsa. Ní dhearna siad cinneadh chun an tiománaí a ghabháil go dtí go ndeachaigh siad isteach ina chuid maoine. Chinn an Ard-Chúirt go raibh an toiliú intuigthe maidir le ligean do na Gardaí dul isteach ar an gcabhsa chun an dlí a fhorfheidhmiú arna chúlghairm sna himthosca sin agus, da bhrí sin, d'aontaigh sí gur cheart na cúisimh a dhíbhe.

4.16 In *Director of Public Prosecutions v. Jack Delaney* High Court [2003] 1 IR 363, lean na Gardaí an tiománaí isteach i dteach a dhearthár. D'fhéadfadh sé go raibh na Gardaí tar éis foghail a dhéanamh ar mhaoin a dhearthár ach níorbh ionann sin agus a rá go raibh gabháil an tiománaí neamhbhailí. Ach chinn an chúirt go raibh an ghabháil mídhleathach mar nach bhfuil

cumhacht ag na Gardaí faoi alt 39(2) den Acht um Thrácht ar Bhóithre, 1994, dul isteach i dteaghais chun tiománaí atá ar meisce a ghabháil de bhun alt 49(8) den Acht céanna.

An Clár Cosanta Finnéithe

4.17 I gcoitinne, ní féidir íocaíocht a thabhairt d'fhinné chun fianaise a thabhairt ach tá finné i dteideal caiteachais a fháil. I gcás ina mbeadh beatha finné i mbaol mar gur thug sé fianaise, is féidir é a chur isteach i gclár cosanta finnéithe a mbeadh tairbhe áirithe airgeadaíochta ag gabháil leis. Breithníodh an t-ábhar sin in *Director of Public Prosecutions v. John Gilligan* Court of Criminal Appeal (unreported, 8 August 2003). Chinn an chúirt nach raibh sé mídhleathach tairbhí áirithe a thairiscint mar chuid de chlár cosanta finnéithe, d'ainneoin go mbeadh sé mídhleathach suim shonrach airgid a thairiscint chun fianaise a fháil ó dhuine. Ba é an cheist ba thábhachtaí ná ar cheap an finné go raibh íocaíocht á fáil aige ar a chuid fianaise. Más rud é nár cheap, bheadh an fhianaise inghlactha.

CÚSIMH IOLRACHA

Cúisimh iolracha – triail amháin

4.18 I rial 3 den Chéad Sceideal den Acht Breithiúnais Choiriúla (Riara), 1924, luaitear gur féidir duine a ionchúiseamh i dtríail amháin mar gheall ar chionta éagsúla más rud é go n-éiríonn na cionta sin as na fórais chéanna nó gur cuid de shraith cionta den chineál céanna nó den chineál comhchosúil iad. Is minic nach gá go ndearnadh iad an tráth céanna ach, de ghnáth, bíonn nasc éigin eatarthu. Is féidir trialacha ar leithligh a bheith ann má cheapann an breitheamh nach cuí triail amháin a bheith ann, faoi alt 6(3) den Acht Breithiúnais Choiriúla (Riara), 1924. In *The People (Director of Public Prosecutions) v. Catherine Nevin* Court of Criminal Appeal (unreported, 14 March 2003), chinn an chúirt, maidir le trí

chúiseamh i gcoinne Bean Nevin a bhain le daoine a shireadh chun a fear céile a dhúnmharú, go bhféadfaí iad a thriail an tráth céanna leis an gcúiseamh i ndúnmharú ina coinne ó tharla go raibh fórais shuntasacha ann a bhain leis na ceithre chúiseamh agus go raibh fianaise ann i dtacaíocht leis na cúisimh go léir a thug le fios go raibh comhcheilge ann, nó iarracht ar chomhcheilg, chun a fear céile a dhúnmharú agus chun déanamh amhlaidh ar mhodhanna den chineál céanna.

CAIBIDIL 5

DÍSPEAGADH CÚIRTE

- 5.1 I roinnt cásanna le déanaí déileáladh le foilsíú ábhair a bheadh dochrach do thriail chóir daoine faoi dhrochamhras, is é sin le rá, foilsíú ábhair tráth nach raibh na daoine sin cúisithe agus, freisin, tar éis iad a bheith cúisithe.
- 5.2 Tá cineálacha éagsúla díspeagtha cúirte ann. Folaíonn díspeagadh os comhair na cúirte aon ghníomh a dhéantar, nó aon fhocail a deirtear, sa chúirt nó i maighne na Cúirte, ar gníomh é nó ar focail iad a chuireann bac, nó a chuireann isteach, ar riaradh an cheartais nó atá ceaptha chun déanamh amhlaidh, mar shampla, cur isteach ar imeachtaí Cúirte, ionsaí arna dhéanamh sa chúirt, finnéithe do mhaslú na Cúirte nó do díspeagadh na Cúirte, diúltú a bheith curtha faoi mhionn gan leithscéal dlíthiúil nó ceisteanna a fhreagairt sa chúirt. Folaíonn díspeagadh lasmuigh den chúirt ábhar a fhoilsíú atá ceaptha, nó ar dóigh dó, dochar a dhéanamh do thriail chóir.
- 5.3 Is féidir le breitheamh na trialach díspeagadh os comhair na cúirte a phionósú ar mhodh achomair. Is féidir díspeagadh lasmuigh den chúirt a phionósú ar díotáil nó is féidir déileáil leis trí nós imeachta speisialta ar a dtugtar astú agus cimiú. Faoin nós imeachta sin, is féidir leis an Stiúrthóir Ionchúiseamh Poiblí a iarraidh ar an Ard-Chúirt, ina suí di gan ghiúiré, a chinneadh gur tharla díspeagadh agus é a phionósú go cuí.
- 5.4 In *Director of Public Prosecutions v. Independent Newspapers Ireland Limited and Others* High Court [2003] 2 IR 367, rinneadh beirt duine a bhí faoi dhrochamhras a chúiseamh dhá lá tar éis teagmhais tráchta ina bhfuair beirt duine bás. Leanaí a bhí iontu de réir bhrí an Achta Leanaí, 2001. Bhí chuid mhór poiblíochta ann sna laethanta tar éis na tionóisce, sular cúisíodh iad agus dá éis sin, ar phoiblíocht í inar ainmníodh an bheirt faoi dhrochamhras agus inar léiríodh go raibh siad faoi bhannaí i ndáil le cúisimh eile agus go raibh coireanna eile déanta acu roimhe sin.
- 5.5 Thug an Stiúrthóir Ionchúiseamh Poiblí roinnt eagraíochtaí de chuid na meán cumarsáide os comhair na cúirte mar gheall ar dhíspeagadh. Maidir le díspeagadh a líomhnaíodh a bheith ann sula ndearnadh na cúisimh, rinne an Breitheamh Uasal Kelly breithniú ar thuarascáil ón gCoimisiún um Athchóiriú an Dlí sa bhliain 1991 a bhain le díspeagadh agus inar moladh gur ceart na rialacha céanna atá ann tar éis duine a chúiseamh a bheith ann freisin i gcás ina bhfuiltear ar tí cúisimh a dhéanamh. Chinn an breitheamh go mbeadh gá le reachtaíocht chun an dlí a leathnú sa tslí sin. Thacaigh sé le cuid de na gearáin a bhain le nithe a foisíodh tar éis na cúisimh a dhéanamh.
- 5.6 In *Director of Public Prosecutions v. Independent Newspapers and Vincent Doyle* 2003 30 MCA, thionscain an Stiúrthóir imeachtaí astaithe san Ard-Chúirt i gcoinne nuachtáin a d'ainmigh cúisí agus a d'ainmnigh é freisin mar dhuine a ciontaíodh roimhe sin i gcoinne a bhí comhchosúil leis na cionta de chineál gnéasach a raibh sé cúisithe mar gheall orthu an tráth sin. Thug an nuachtán céanna le fios gur phéidifileach a bhí ann agus thaispeáin sé grianghraf de á thionlacan ón gcúirt agus é ceangailte de Gharda le glais lámh.
- 5.7 Cúisíodh an cúisí tamall measartha fada roimh an díspeagadh líomhnaithe agus ní raibh aon dáta socraithe don triail. Chinn an Breitheamh Uasal Kearns gur beag an seans go ndéanfaí dochar don triail. Le go mbeidh díspeagadh ann, ní mór an seans sin a bheith réadúil. Thairis sin, ní raibh aon intinn mhioscaiseach ann ar thaobh an iriseora a bhí i dteideal glacadh leis nach mbeadh an triail ann go ceann tréimhse réasúnta fada. Diúltaíodh don iarratas ón Stiúrthóir ar astú.
- Poiblíocht Dhochrach sna Meáin**
- 5.8 In *The People (Director of Public Prosecutions) v. Catherine Nevin* Court of Criminal Appeal

(unreported, 14 March 2003), dúradh go bhféadfadh tuairisciú sna meáin claontuairim a chruthú in intinn an ghiúiré. D'fhéadfadh triail éagórach a bheith ann dá bharr sin. Ba ar an iarratasóir a bhí an dualgas chun a shuíomh go raibh baol réadúil ann go mbeadh triail éagórach ann agus nach bhféadfaí sin a sheachaint trí rialuithe agus treoracha cuí ó bhreitheamh na trialach. Iarradh ar ghiúróirí ionchasacha sa triail a rá leis an gcúirt ar chreid siad go raibh claontuairim acu mar gheall ar an bpoiblíocht agus dúirt líon suntasach giúróirí a roghnaíodh gur chreid siad amhlaidh agus saoradh ó dhualgas mar ghiúróirí iad. Chinn an Chúirt Achomhairc Choiriúil go rabhtas tar éis déileáil go leordhóthanach, ar an dóigh sin, leis an gceist a bhain le seans go mbeadh claontuairim ann. Ina theannta sin, cheadaigh an chúirt cinneadh bhreitheamh na trialach chun coc a chur le haitt áirithe 'sainspéise' ina mbeadh tuairisc ar dhreach, éadaí agus iompair an chúisí sa chúirt, mar aon le cosc ar ghrianghraif. Luadh arís tuairisc bhreitheamh na trialach ar ailt den sórt sin, is é sin le rá, "gurbh iriseoireacht den chineál ba shuaráí a bhí iontu agus iad ceaptha chun nuachtáin a dhíol, agus chuige sin amháin, gan aird a thabhairt ar dhínit Bhean Nevin mar dhuine".

CAIBIDIL 6

IONCHÚISIMH THAR CEANN AN ÚDARÁIS SLÁINTE AGUS SÁBHÁILTEACHTA

- 6.1 Ní gníomhaireacht imscrúdúcháin í Oifig an Stiúrthóra Ionchúiseamh Poiblí agus níl aon ról foirmiúil aici i ndáil le himscrúdú cionta seachas comhairle a thabhairt d'imscrúdaitheoirí ar shaincheisteanna dlí agus ar shaincheisteanna gaolmhara de réir mar is gá.
- 6.2 Is é an Garda Síochána an ghníomhaireacht a bhfuil an fhreagracht phríomha uirthi as imscrúdú a dhéanamh i dtaobh líomhaintí maidir le cionta coiriúla sa tír seo. Tá sainghníomhaireachtaí imscrúdúcháin eile ann, afach, mar shampla an tÚdarás Sláinte agus Sábháilteachta (an tÚdarás).
- 6.3 Is comhlacht reachtúil neamhspleách é an tÚdarás. Bunaíodh é de bhun an Achta um Shábháilteacht, Sláinte agus Leas ag an Obair, 1989.
- 6.4 Tá feidhm iolrach ag an Údarás. Tá sé freagrach as sláinte agus sábháilteacht san ionad oibre in Éirinn a chur chun cinn agus a fhorfheidhmiú. Déanann sé faireachán ar chomhlíonadh reachtaíochta sláinte agus sábháilteachta ceirde agus glacann sé bearta forfheidhmiúcháin, lena n-áirítear ionchúiseamh a dhéanamh más gá sin. Cuireann sé é féin ar fáil mar shainionad eolais agus comhairle ginearálta d'fhostóirí, d'fhostaithe agus do dhaoine féinfhostaithe agus déanann sé oideachas agus oiliúint i réimse na sláinte agus na sábháilteachta ceirde a chur chun cinn.
- 6.5 Tá an ceart ag an Údarás ionchúisimh achoimre a thionscnamh a faoina ainm féin. An Stiúrthóir Ionchúiseamh Poiblí amháin atá in ann ionchúiseamh a dhéanamh ar díotáil.
- 6.6 Ó tharla go bhfuil gníomhaíocht tionscail ag éirí níos casta i gcoitinne, tá an tÚdarás ag iarraidh forbairt a dhéanamh, i gcomhréir lena fheidhm rialála agus lena fheidhm chomhairlitheach, ar chumas imscrúdúcháin lena soláthrófar bonn ceart le haghaidh ionchúisimh choiriúil i gcásanna cuí.
- 6.7 Mheas an Stiúrthóir agus an tÚdarás araon gurbh inmhianaithe caidreamh oibre a fhorbairt idir Oifig an Stiúrthóra Ionchúiseamh Poiblí agus an tÚdarás, ar caidreamh é trína bhféadfaí oilteacht Oifig an Stiúrthóra i dtaca le hionchúisimh choiriúla agus oilteacht an Údaráis i dtaca le hanailís dlí-eolaíoch ar thionóiscí tionscail a chónascadh, go háirithe d'fhonn bonn maith a bhunú le haghaidh ionchúiseamh indíotála.
- 6.8 Chuige sin, tar éis roinnt cruinnithe tráthrialta, tá forbairt déanta ar thuiscint trína ndearnadh feidhmeanna an dá ghníomhaireacht faoi seach a leagan amach agus trí oilteacht a chéile a shainaithint.
- 6.9 Láimhseálann an Stiúrthóir Ionchúiseamh Poiblí ionchúisimh achoimre thar ceann an Údaráis, ar fheidhm í sin a bí á feidhmiú ag an bPríomh-Aturnae Stáit, ó m na Nollag 2001.
- 6.10 Tá forbairt déanta ag Rannán na nAturnaetha in Oifig an Stiúrthóra Ionchúiseamh Poiblí, atá faoi cheannas an Phríomh-Aturnae Ionchúisimh, ar dlúthchaidreamh oibre leis an Údarás d'fhonn nósanna imeachta a chomhaontú ar nósanna imeachta iad a bhaineann leis an Údarás do chur comhad ar fáil, leis an ábhar atá le bheith sna comhaid sin agus, freisin, le láimhseáil ionchúiseamh thar a gceann.
- 6.11 Feidhmíonn an Príomh-Aturnae Ionchúisimh thar ceann an Údaráis in ionchúisimh i mBaile Átha Cliath agus feidhmíonn na hAturnaetha stáit áitiúla thar cheann an Údaráis lasmuigh de Bhaile Átha Cliath. Tionscnaítear ionchúisimh achoimre in ainm an Údaráis Náisiúnta um Shábháilteacht agus Sláinte Ceirde (arb é teideal foirmiúil an Údaráis é).
- 6.12 Is é an Stiúrthóir Ionchúiseamh Poiblí a thionscnaíonn ionchúisimh ar díotáil. Cuireann an Príomh-Aturnae Ionchúisimh seirbhís aturnaean agus abhcóide ar fáil le haghaidh ionchúiseamh den sórt sin. Is faoin Stiúrthóir Ionchúiseamh

Poiblí amháin atá sé cinneadh a dhéanamh i dtaobh ionchúiseamh a dhéanamh ar díotáil agus feidhmíonn an Stiúrthóir go neamhspleách ar an Údarás. Le linn na feidhmeanna sin a fheidhmiú, áfach, déanfaidh an Stiúrthóir tuairimí agus moltaí an Údaráis a bhreithniú.

- 6.13 Ina theannta sin, cuireann Rannán na nAturnaetha seirbhís aturnaetha agus abhcóide ar fáil le haghaidh imeachtaí athbhreithnithe bhreithiúnaigh a éiríonn as ionchúisimh achoimre arna dtionscnamh in ainm an Údaráis.
- 6.14 Tá forbairt déanta ar chóras inmheánach tuairiscithe lena chinntiú go bhfuil an tÚdarás in ann faireachán a dhéanamh ar thionscnamh agus ar dhul chun cinn ionchúiseamh ará ar siúl acu ar fud na tíre. Tá athbhreithniú ar siúl ar nósanna imeachta oibre idir Rannán na nAturnaetha in Oifig an Stiúrthóra Ionchúiseamh Poiblí, an tÚdarás agus aturnaetha stáit áitiúla. Áirítear san athbhreithniú sin sraith treoirlínte maidir le hionchúiseamh a dhéanamh thar ceann an Údaráis agus tá na treoirlínte sin beagnach réidh.

CAIBIDIL 7

GNÉITHE A BHAINNEAN LE PIANBHREITHEANNA

7.1 Faoi Alt 2 den Acht um Cheartas Coiriúil, 1993, féadfaidh an Stiúrthóir Ionchúiseamh Poiblí iarratas a dhéanamh chuig an gCúirt Achomhairc Choiriúil ar athbhreithniú a dhéanamh ar phianbhreith más dealraitheach don Stiúrthóir, maidir le pianbhreith arna forchur ag cúirt (an Chúirt Chuarda, an Phrómh-Chúirt Choiriúil nó an Chúirt Choiriúil Speisialta) tar éis duine a chiontú, go bhfuil an phianbhreith sin róthrócaireach. Ní mór an t-iarratas a dhéanamh ar fhógra arna thabhairt don duine ciontaithe agus/nó dá aturnae laistigh de 28 lá ón lá a fhorchuirtear an phianbhreith.

7.2 Ó tháinig an tAcht i bhfeidhm sa bhliain 1993, bhí roinnt saincheistean ann maidir le ról an ionchúisimh ag an éisteacht ar lena linn a fhorchuirtear an phianbhreith.

7.3 Sa Ráiteas maidir le Treoirínite Ginearálta d'Ionchúisitheoirí a d'eisigh an Stiúrthóir i mí na Samhna 2001 tugtar achoimre mar a leanas ar ról an ionchúisitheora sa phróiseas a ghabhann le pianbhreith a fhorchur:

- A chinntiú go bhfuil eolas ag an gcúirt ar an réimse roghanna atá ar fáil aici maidir le pianbhreith a ghearradh;
- Aird na cúirte a tharraingt ar aon údarás nó reachtaíocht iomchuí a d'fhéadfadh a bheith ina chabhair le linn an phianbhreith chuí a chinneadh;
- Cabhrú leis an gcúirt chun nach ndéanfar earráid inachomhairc agus aird na cúirte a tharraingt ar aon earráid fíorais nó dlí a dhéanfaidh an chúirt le linn pianbhreith a ghearradh.

Dualgas chun aon earráid i bprionsabal arna déanamh ag Breitheamh na trialach a shainaitint

7.4 Sa chás dar teideal *Director of Public Prosecutions v Kevin Keegan* Court of Criminal Appeal *ex tempore* (unreported, 28 April 2003)

dúirt an chúirt go raibh deacracht mhór aici i dtaca le déileáil leis an chás áirithe sin ar an mbonn gur líomhnaíodh earráid shonrach prionsabail mar nach dearnadh aon iarracht chun an earráid líomhnaithe prionsabail a chur in iúl tráth na trialach, nó chun argóint a dhéanamh ar a shon sin.

7.5 Rinne an chúirt tagairt ansin do chás dar teideal *Director of Public Prosecutions v. George Redmond* [2001] 3 IR 390, inar tharraing an Chúirt Achomhairc Choiriúil aird ar an riail a chuaigh siar go dtí an bhliain 1929 á rá nach mór do chosantóir, ach amháin in imthosca urghnácha, i gcás ina ndéanann sé achomharc i gcoinne pianbhreithe agus ina ndéanann sé iarracht earráid phrionsabail a líomhaint, an pointe sin a bheith déanta aige i gcúirt na trialach sula bhféadfaí cead a thabhairt é a dhéanamh ar achomharc. Dar leis an gcúirt, ní raibh aon chúis ann nach mbeadh feidhm ag an riail sin freisin maidir le hachomhairc alt 2 ón Stiúrthóir.

Easpa foirmiúlachta le linn fianaise a thabhairt do bhreitheamh atá ag gearradh pianbhreithe

7.6 In *Director of Public Prosecutions v. Kevin Keegan* Court of Criminal Appeal *ex tempore* (unreported, 28 April 2003) cháin an chúirt freisin an easpa foirmiúlachta a bhíonn ann uaireanta le linn fianaise a thabhairt do bhreitheamh atá ag gearradh pianbhreithe. De ghnáth, iarrann an chosaint ar an ionchúiseamh cruthúnas iomlán a thabhairt maidir le gach fianaise a chuirtear faoi bhráid na cúirte. Nuair a thagann an t-am chun pléadail maolaithe a dhéanamh thar ceann an chúisí is minic a thugtar teistiméireachtaí agus a leitheidí don chúirt gan aon chruthúnas foirmiúil ina leith. Cháin an Chúirt Achomhairc Choiriúil na cleachtais neamhfhoirmiúla sin.

Athbheithniú ar Ghearradh Pianbheithheanna, agus ar Róthrócaire

7.7 Tháinig gearradh pianbheithheanna, róthrócaire agus an caidreamh idir na breithiúna agus an Rialtas chun cinn in *Director of Public Prosecutions v. Grant Alexiou* Court of Criminal Appeal (unreported, 31 July 2003). In iarratas ar athbheithniú a dhéanamh ar phianbheith ar fhoras róthrócaire, dúirt an Stiúrthóir Ionchúiseamh Poiblí go ndearna breitheamh léannta na trialach earráid i bprionsabal sa chás bunaidh nuair a ghearr sé pianbheith fhionraithe ceithre bliana ar an tuiscint go raibh an cosantóir chun imeacht as an tír láithreach. Dúirt an Stiúrthóir go ndearnadh an chumhacht chun a ordú do náisiúnaigh choigríche imeacht as an Stát a thabhairt don Aire Dlí agus Cirt leis an Acht Inimírce, 1999, agus, trí ordú den sórt sin a dhéanamh, go raibh breitheamh na trialach i ndiaidh cur isteach ar chumhacht fheidhmiúcháin an Aire. Le linn an t-achomharc a dhíbhe, chinn an Chúirt Achomhairc Choiriúil go raibh ordú bhreitheamh na trialach á cheangal ar an gcosantóir imeacht as an tír ina choinníoll a bhí ag gabháil leis an bpianbheith fhionraithe agus nárbh ordú ionnarbtha é. Ghníomhaigh breitheamh na trialach de réir na roghanna a bhí ar fáil aige nuair a ghearr sé an phianbheith. Ach bhí an chúirt den tuairim nár dhea-chleachtas é, i bprionsabal, coinníoll iomlánach a leagan síos á rá nár cheart don chosantóir teacht ar ais chuig an tír riamh.

Nithe Maolaitheacha

7.8 Rinneadh ceist maidir le difríocht idir pianbheithheanna i leith páirtithe sa chion céanna ar thriail breithiúna éagsúla iad ar dhátaí éagsúla a bhreithniú in *Director of Public Prosecutions v. Duffy & O'Toole* Court of Criminal Appeal (unreported, 21 March 2003). Dúirt na cosantóirí go raibh difríocht ann idir na pianbheithheanna a gearradh orthusan agus pianbheith ab éadroime a gearradh i dtrial ar

leithligh ar rannpháirtí eile sa chion. Luaigh an Chúirt Achomhairc Choiriúil breithiúna Walsh J. in *The People (Attorney General) v. Poyning* [1972] IR 402 inar dúradh, maidir le cás ina ndéantar beirt phríosúnach a dhíotchúiseamh le chéile agus ina bhfaigheann duine amháin díobh pianbheith níos éadroime ná an duine eile, nach gá gurb ionann sin is a rá go bhfuil an phianbheith is déine éagothrom. Thairis sin, má fhaigheann comhchúisí pianbheith róghairid ní cúis é sin chun cur isteach leis an bpianbheith níos faide atá gearrtha ar an gcúisí eile. Bhí an Chúirt Achomhairc Choiriúil den tuairim nach ceart do chúirt achomhairc cur isteach a dhéanamh, i gcás difríocht a bheith ann idir pianbheithheanna a ghearrtar ar dhaoine a bhí páirteach sa chion céanna, ach amháin ar dhá chúis: is é an chéad chúis ná i gcás cúis mhaith gearáin a bheith ann mar gheall ar an difríocht idir na pianbheithheanna ar cúis gearáin í atá infhirinnithe go hoibiachtúil agus is é an dara chúis ná i gcás ina bhféadfadh an difríocht idir na pianbheithheanna éifeacht dhochrach a bheith aici ar mhuinín an phobail as riaradh poiblí an cheartais. Dúirt an Chúirt Achomhairc Choiriúil freisin gurb inmhianaithe, más féidir, comhchúisithe a chur faoi phianbheith an tráth céanna agus gur ceart gurb é an breitheamh céanna a ghearrann na pianbheithheanna orthu.


CAIBIDIL 8

COMHAR IDIRNÁISIÚNTA

- 8.1 Tá cabhair dhlíthiúil agus eiseachadadh idir stáit tar éis teacht chun bheith thar a bheith tábhachtach tráth ar minice a dhéantar gach cineál coireanna, go háirithe coireanna tromáí, a phleanáil agus a chur i gcrích i níos mó ná dlínse amháin. Mar gheall ar shaorghluaiseacht daoine, earraí agus caipitil ar fud an Aontais Eorpaigh tá gluaiseacht coirpeach, drugaí, daoine a bhfuil gáinneáil á déanamh orthu, arm, pléascán, earraí goidte agus fáltais ó choireacht níos éasca freisin. Tá an Stiúirthóir Ionchúiseamh Poiblí freagrach as iarrataí ar chabhair a eisiúint thar ceann na ngníomhaireachtaí imscrúdúcháin (an Garda Síochána, go príomha) agus as iarrataí ar eiseachadadh a eisiúint. Is é an Roinn Dlí agus Cirt, Comhionannais agus Athchóirithe Dlí, tar éis comhairle a fháil ó Oifig an Ard-Aighne, a dhéileálann le hiarrataí a fhaigheann Éire i ndáil le cabhair fhrithpháirteach nó eiseachadadh.
- 8.2 Le dhá bhliain anuas tá méadú tagtha ar an ngníomhaíocht sa réimse seo, is é sin le rá, d'eisigh an Stiúirthóir Ionchúiseamh Poiblí 97 n-iarraidh ar chabhair fhrithpháirteach sa bhliain 2003 i gcomparáid le 92 iarraidh sa bhliain 2002. I gcás iarrataí a tháinig isteach, tuigtear gur thairfead an Roinn Dlí agus Cirt, Comhionannais agus Athchóirithe Dlí, a dhéanann na socruithe chun iarrataí a thagann isteach a fhorghníomhú, titim bheag ar an líon iarrataí a fuarthas sa bhliain 2003 i gcomparáid leis an mbliain 2002. Ach, fós féin, tá an líon iarrataí a fhaightear i bhfad níos mó ná an líon a eisítear, is é sin le rá, fuarthas 231 iarraidh sa bhliain 2002 agus fuarthas 208 n-iarraidh sa bhliain 2003. B'fhiú staidéar a dhéanamh neamhchomhardú sin.
- 8.3 De réir mar atá an dlí faoi láthair, tá sé deacair imscrúduithe lasmuigh den stát a sheoladh i ndáil le cionta a rinneadh laistigh de dhlínse na hÉireann más rud é gurb é atá i gceist ná duine atá faoi dhrochamhras a cheistiú. Sna himthosca sin, ní bhíonn aon rogha ag ionchúisitheoir de ghnáth seachas eiseachadadh an duine atá faoi dhrochamhras a iarraidh, rud a fhágann nach féidir ceistiú a dhéanamh, sin nó fanacht go dtagann an duine atá faoi dhrochamhras ar ais agus d'fhéadfadh sé tarlú nach dtiocfaidh an duine sin ar ais choíche. Chomh maith leis sin, d'fhéadfadh an neamhchomhardú a bheith bainteach le foirmiúlacht chomparáideach córas áirithe imscrúdúcháin nuair a chuirtear iad i gcomparáid le córas an dlí choitinn ar dá réir a dhéantar imscrúduithe s'againne. De réir córais s'againne, is féidir leis an nGarda Síochána fiosrúcháin a dhéanamh gan aon ghá le nósanna imeachta foirmiúla maidir le hiarraidh agus, i ndlínsí eile, níl ann ach nósanna imeachta foirmiúla. Tarlaíonn sé sin mar nach féidir fiosrúcháin den tsamhail chéanna a dhéanamh i roinnt córas de chuid mhór-roinn na hEorpa, ach amháin faoi réir maoirseachta ag breitheamh.
- 8.4 Ní léir go bhfuil an neamhchomhardú sin ann i gcás eiseachadtaí. I ndáil le heiseachadadh, lorg Éire 36 eiseachadadh sa bhliain 2002 agus 38 n-eiseachadadh sa bhliain 2003. Tá laghdú beag tagtha sa tréimhse chéanna ar an líon iarrataí ar eiseachadadh a fuair Éire, is é sin le rá, bhí 28 n-iarraidh ann sa bhliain 2003 i gcomparáid le 32 iarraidh sa bhliain 2002.
- 8.5 Ar leith uaidh sin, leanann Éire dá ról gníomhach i dtaca le comhar le Ballstáit de chuid an Aontais Eorpaigh a dheimhniú i ndáil le nithe a bhaineann le coireacht agus tá pointí teagmhála coimeáda ar bun aici sa Ghréasán Eorpach Breithiúnach agus tá ionadaí aici sa chomhlacht breithiúnach comhordaitheach Eorpach, EUROJUST. Tá ionadaíocht ag Éirinn freisin san aond giúistísí de OLAF (Office Européen de Lutte Anti-Fraude), is é sin, gníomhaireacht de chuid an Aontais Eorpaigh a bunaíodh chun leasanna airgeadais na gComhphobal Eorpach a chosaint ar chalaos agus ar éilliú. I rith na bliana seo caite, thionscain Éire reachtaíocht chun an Barántas Gabhála Eorpach a thabhairt isteach agus, le fírinne, ghlac sé sin ionad nósanna imeachta eiseachadta laistigh den Aontas Eorpach. Déantar an t-ábhar sin a phlé ar shlí níos mine i gCaibidil 9 den tuarascáil seo. Ina theannta sin, déanfaidh Éire reachtaíodh a thionscnamh go gairid chun comhfhoirne imscrúdúcháin de chuid Bhallstáit an Aontais Eorpaigh a thabhairt isteach.


Cairt 8.1

Iarrataí ar Chabhair Fhrithpháirteach arna n-eisiúint ag an Stúirthóir Ionchúiseamh Poiblí




Cairt 8.2

Iarrataí ar Chabhair Fhrithpháirteach a fuarthas sa Roinn Dlí agus Cirt, Comhionannais & Athchóirithe Dlí




Cairt 8.3

Iarrataí ar Eiseachadhadh arna ndéanamh ag Éirinn



Cairt 8.4

Iarrataí ar Eiseachadhadh a fuair Éire



CAIBIDIL 9

AN BARÁNTAS GABHÁLA EORPACH

- 9.1 Shínigh an tUachtarán an tAcht um Barántas Gabhála Eorpach, 2003, ar an 28 Nollaig, 2003, agus tháinig an tAcht sin i bhfeidhm ar an 1 Eanáir, 2004. Leis an Acht, tugtar éifeacht d'fhorálacha do Chreatchinnéadh na Comhairle ar an mBarántas Gabhála Eorpach agus ar na nósanna imeachta idir Ballstáit de chuid an Aontais Eorpaigh maidir le daoine a thabhairt suas, agus déantar socrú leis i dtaobh nithe a bhaineann leis an méid sin.
- 9.2 Maidir leis na socruithe a tugadh isteach leis an mBarántas Gabhála Eorpach i ndáil le daoine atá á lorg a thabhairt suas, glacann siad ionad na socruithe eiseachadta idir Éire agus gach Ballstát eile de chuid an Aontais Eorpaigh. Beidh feidhm aige freisin idir Éire agus Stáit Aontachais nua a luaite a ghlacann siad na bearta riachtanacha intíre. Amhail idir Ballstáit an Aontais Eorpaigh, glacann sé ionad na socruithe láithreacha eiseachadta atá bunaithe ar Choinbhinsiún Eiseachadta 1957 Chomhairle na hEorpa agus cuirtear nós imeachta simplithe i bhfeidhm maidir le heiseachadadh.
- 9.3 I gcás ina n-iarrtar duine a eiseachadadh agus go gcreidtear go bhféadfadh sé go bhfuil an duine sin a bheith in aon cheann de na Ballstáit eile de chuid an Aontais Eorpaigh, déanfar iarratas chuig Údarás Breithiúnach laistigh den Stát chun Barántas Gabhála Eorpach a eisiúint. Is féidir an t-iarratas sin a dhéanamh chuig an gcúirt a d'eisigh bharántas intíre chun an duine sin a ghabháil nó chuig an Ard-Chúirt. Is é Rannán na nAturnaetha in Oifig an Stiúrthóra Ionchúiseamh Poiblí a dhéanfaidh na hiarratais sin anois, tar éis treoracha a fháil ón Stiúrthóir.
- 9.4 Ní mór formáid an bharántais a bheith chomh cosúil agus is indéanta leis bhformáid ghinearálta atá leagtha amach sa Chreatchinnéadh. Dá bharr sin, beidh formáid chomhréireach ann tríd is tríd.
- 9.5 Tá nós imeachta comhaontaithe curtha ar bun idir an Garda Síochána, Oifig an Stiúrthóra Ionchúiseamh Poiblí agus an tSeirbhís Chúirteanna. An Garda Síochána a thionscnaíonn an iarraidh ar eiseachadadh trí dréachtbharántas a sholáthar atá bunaithe ar fhaisnéis a bhfuil eolas áirithe acu ina leith, lena n-áirítear céannacht an duine, achoimre ar an gcion agus faisnéis ábharthach eile. Cuirtear an dréacht sin ar aghaidh chuig Rannán na nAturnaetha in Oifig an Stiúrthóra Ionchúiseamh Poiblí le gur féidir déileáil leis na saincheisteanna riachtanacha dlíthiúla go léir agus ansin cuirtear ar aghaidh chuig Rannán na dTreacha é lena cheadú agus chun treoir a fháil iarratas a dhéanamh. Cuirtear an dréacht ar aghaidh chuig Rannán na gCúirteanna áit ina socraítear am agus dáta don iarratas agus breitheamh ar os a chomhair is ceart an t-iarratas a dhéanamh agus óna gcuirtear an dréacht ar aghaidh chuig an mbreitheamh lena bhreithniú roimh an iarratas.
- 9.6 Cuireann na Gardaí barántais chomhlánaithe ar aghaidh chuig an Údarás Lárnach le haghaidh Cabhrach Frithpháirtí sa Roinn Dlí agus Cirt, Comhionannais agus Athchóirithe Dlí lena sheoladh chuig an áit chuí.
- 9.7 Déanfar faireachán leanúnach ar na nósanna imeachta.

CUID IV
SAORÁIL FAISNÉISE

Forbairtí sa bhliain 2003

- 10.1 I mbliana, achtaíodh an tAcht um Shaoráil Faisnéise (Leasú), 2003. Dá bharr sin, bhí gá le hoiliúint bhreise a chur ar fáil do gach oifigeach breithiúnachta Saorála Faisnéise agus do gach athbhreithneoir Saorála Faisnéise agus tá sé sin á dhéanamh ar bhonn leanúnach.
- 10.2 Tugadh isteach cuid mhór leasuithe leis an Acht lena n-áirítear táille chaighdeánach a thabhairt isteach ar gach iarraidh arna fáil an 7 Iúil 2003 nó dá éis.
- 10.3 San iomlán, cuireadh cúig iarraidh faoi bhráid na hOifige i rith na bliana. Tugadh diúltú, faoi na hAchtanna, i leith ceithre cinn de na cúig iarraidh sin agus géilleadh d'iarraidh amháin ina hiomláine. Tháinig ceann amháin de na hiarrataí ó iriseoir agus tháinig na ceithre cinn eile ó dhaoine de chuid an phobail i gcoitinne.
- 10.4 I gcomparáid le líon na n-iarrataí a fuarthas anuraidh, tháinig laghdú 70% ar an líon iarrataí a fuarthas i mbliana. Is laghdú measartha suntasach é sin.

Eolas maidir le Saoráil Faisnéise

- 10.5 Lean Oifig an Stiúrthóra Ionchúiseamh Poiblí de bheith ag cur eolais maidir le Saoráil Faisnéise ar fáil ar shlí chomh héasca is féidir. Ina theannta sin, tá athbhreithniú déanta ag an Oifig ar a Leabhar Tagartha alt 15 agus alt 16 i gcomhreir leis an reachtaíocht nua a agus tá sé sin ar fáil go forleathan i leabharlanna poiblí ar fud na tíre agus, freisin, ar ár láithreán gréasáin ag www.dppireland.ie. Leagtar amach san fhoilseachán sin gnó na hOifige lena n-áirítear na cineálacha taifead a choimeádtar. Tugtar míniú ann freisin go bhfuil taifid arna gcoimeád nó arna gcruthú ag an oifig seo, seachas taifid a bhaineann le riaradh na hOifige i gcoitinne, srianta faoi alt 46 (1)(b) den Acht um Shaoráil Faisnéise. Is é a chiallaíonn an srian sin ná nach bhfuil rochtain ar fáil ar na taifid sin faoin Acht um Shaoráil Faisnéise.

- 10.6 Is féidir teagmháil a dhéanamh leis an Aonad Saorála Faisnéise leis an teileafón nó le ríomhphost ag foi@dppireland.ie - is féidir an seoladh ríomhphoist sin a úsáid le haghaidh fiafraithe ginearálta maidir le Saoráil Faisnéise ach ní féidir é a úsáid chun iarraidh a chur isteach.

Staitisticí

- 10.7 Fuarthas dhá iarratas nach raibh táille in éineacht leo agus, dá bhrí sin, níor próiseáladh iad.

Iarrataí a Fuarthas sa bhliain 2003




Iarrataí ar Géilleadh Dóibh	1
Iarrataí ar Diúltaíodh Dóibh	4
AN LÍON IOMLÁN IARRATAÍ	5

Iarratasóirí 2003




Iriseoir	1
Daoine den Phobal i gCoitinne	4

Déantar miondealú ar na hiarrataí Saorála Faisnéise a fuarthas agus ar na cinntí a rinneadh sa tréimhse 3 bliana ó 1 Eanáir 2001 go 31 Nollaig 2003 a thaispeáint sa chairt thíos:

Iarrataí a Fuarthas	2003	2002	2001
Daoine den Phobal	4	12	11
Foireann	0	1	3
Iriseoirí	1	3	1
Eile	0	1	2
IOMLÁN	5	17	17



Cinntí a Rinneadh	2003	2002	2001
Iarrataí ar Géilleadh Dóibh	1	1	1
Iarrataí ar Géilleadh Dóibh Go Páirteach	0	0	3
Iarrataí a Aistríodh faoi a.7(3) den Acht	0	0	1
Iarrataí a Tarraingíodh Siar	0	2	1
Iarrataí ar Diúltaíodh Dóibh	4	14	11
IOMLÁN	5	17	17



CUID V
STAITISTICÍ

CAIBIDIL 11

STAITISTICÍ MAIDIR LE COMHAID IONCHÚISEAMH

NÓTA MÍNIÚCHÁIN MAIDIR LEIS NA STAITISTICÍ

Tiomsaíodh na staitisticí atá sa tuarascáil seo ó shonraí a baineadh as ár gcórais Teicneolaíochta Eolais. Tá na córais á bhforbairt go leanúnach chun feabhas a chur ar chaighdeán na sonraí atá á dtáirgeadh. Sa chuid is mó cásanna tá na leaganacha uasdátaithe de na sonraí leagtha amach i dTuarascáil Bhliantúil 2002 d'fhonn cuntas níos iomláine a thabhairt ar an dul chun cinn a rinneadh ón tráth a foilsíodh na sonraí roimhe seo. Mar gheall ar athrú leanúnach ar stádas sonraí aon tráth áirithe e.g. comhaid 'faoi bhreithniú' nó cásanna 'le héisteacht', beidh faisnéis a thugtar sa tuarascáil seo éagsúil leis an bhfaisnéis don bhliain chéanna i dtuarascáil na bliana seo caite. Ina theannta sin, d'fhéadfadh sé nach mbeifear in ann comparáid iomlán a dhéanamh le sonraí ó dhá bhliain áirithe mar, le himeacht aimsire, tugtar tuilleadh cásanna chun críche agus, dá bhrí sin, bíonn an fhaisnéis a bhaineann leis na blianta is déanaí níos iomláine ná an fhaisnéis a bhaineann le blianta roimhe sin. Mura luaitear a mhalairt, uasdátaíodh na sonraí go léir atá sna staitisticí seo i mí Bhealtaine 2004.

AN LÍON IOMLÁN COMHAD A FUARTHAS

I gCairt 11.1 taispeántar an líon iomlán comhad a fuair Oifig an Stiúrthóra Ionchúiseamh Poiblí ón mbliain 1976 go dtí an bhliain 2003.

I mí na Nollag 2001 rinneadh Rannán Coiriúil an Phríomh-Atur nae Stáit a aistriú chuig Oifig an Stiúrthóra Ionchúiseamh Poiblí chun bheith ina chuid de Rannán na nAturnaetha in Oifig an Stiúrthóra. Déanann Rannán na nAturnaetha in Oifig an Stiúrthóra Poiblí seirbhís aturnaetha a sholáthar don Stiúrthóir agus gníomhaíonn sé thar a cheann. Ina theannta sin, déileálann an Rannán le cásanna nach gá a tharchur chuig Rannán na dTreochara chun treoir nó cinneadh a fháil ina leith. Áirítear an méid seo a leanas i measc na gcomhad a ndéileáiltear leo i Rannán na nAturnaetha amháin: comhaid ionchúisimh de chuid na Cúirte Dúiche, achomhairc ón gCúirt Dúiche chuig an gCúirt Chuarda agus iarratais Ard-Chúirte ar bhannaí. Tá imlíne i gCairt 11.2 ar an líon comhad arb é an Rannán Aturnaetha, agus an rannán sin amháin a bhí ag déileáil leo.

I gcás formhór mór na gcomhad a fhaightear i Rannán na nAturnaetha, baineann siad le himscrúdú coireanna. Baineann an chuid eile le fiafraithe ginearálta, le nithe a bhfuil athbhreithniú breithiúnach le bheith ann ina leith nó le hiarrataí ar chomhairle dhlíthiúil ón nGarda Síochána nó ó aturnaetha stáit. Ón tráth a bunaíodh an Oifig tá méadú ginearálta tagtha ar an ualach cásanna ó bhliain go bliain, i dtéarmaí líon na gcomhad a fuarthas agus i dtéarmaí chastacht na saincheisteanna nach mór déileáil leo. Tá laghdú suntasach 1000 comhad le sonrú sna figiúirí a bhaineann leis na blianta 2000 go 2001. Sin mar gheall ar athrú I socruithe riaracháin á údarú don Garda Síochána cionta áirithe a ionchúiseamh gan comhaid a chur isteach chuig an Oifig seo roimh ré le haghaidh treochara. Mar atá le feiceáil, d'ainneoin na socruithe riaracháin sin, tháinig méadú arís ar an líon comhad a fuarthas. Tugann sin le tuiscint go bhfuil na treocharaí bunúacha fós ag méadú.


Cairt 11.1

Rannán na dTreoracha 1976 - 2003

Directing Division

Bliain Comhaid

1976	2298
1977	2542
1978	2715
1979	2698
1980	2806
1981	3249
1982	3738
1983	4309
1984	4759
1985	4335
1986	4263
1987	3902
1988	3829
1989	3724
1990	3849
1991	4255
1992	4880
1993	5356
1994	6393
1995	6674
1996	6687
1997	6915
1998	7066
1999	7321
2000	7815
2001	6821
2002	14249*
2003	14400*



* Seo iad na figiúirí cónasctha do na comhaid a fuarthas i Rannán Stiúrtha agus i Rannán Aturnaetha Oifig an Stiúrthóra Ionchúiseamh Poiblí. Tá imlíne ar bhreiseadh síos breise ar na figiúirí sin i gCairt 11.2.

Cairt 11.2

Briseadh síos ar an líon comhad a fuarthas in 2002 agus 2003


	2002	2003
Rannán na dTreoracha	7478	7668
An Rannán Riarachán	6771	6732
Iomlán	14249	14400

RANNÁN NA dTREORACHA

COMHAID A FUARTHAS

Sa chart seo déantar comparáid idir an líon comhad a fuarthas i Rannán na dTreoracha agus an líon daoine faoi dhrochamhras atá ina n-ábhar do na comhaid sin. Baineann cuid mhór comhad le níos mó ná duine amháin faoi dhrochamhras agus dá ndéileálfá le comhad den sórt sin mar aon chás amháin d'fhéadfaí cuma mhíthreorach a chur ar ualach oibre na hOifige. Tá sé tábhachtach, dá bhrí sin, breathnú ar líon iomlán na ndaoine faoi dhrochamhras chomh maith le breathnú ar an líon iomlán comhad.

NÓTA: Tá difríocht bheag ann idir na figiúirí do na blianta 2002 & 2001 agus iad sin a foilsíodh i dTuarascálacha Bliantúla roimhe seo; tharla sé sin mar gheall ar chónascadh agus athaicmiú roinnt comhad.



DIÚSCAIRT CHOMHAID RANNÁN NA dTREORACHA

Taispeánann na cairteanna seo a leanas miondealú ar dhiúscairt na gcomhad a fuarthas i Rannán na dTreoracha sna blianta 2001, 2002 & 2003 (amhail Bhealtaine 2004). Cuireann an Garda Síochána agus sainghníomhaireachtaí imscrúdúcháin comhaid faoi bhráid na hOifige go díreach chuig Rannán na nAturnaetha nó chuig aturnaí stáit áitiúil chun treoir a fháil i dtaobh an ceart nó nach ceart ionchúiseamh a dhéanamh. Ag brath ar thromchúis an chiona agus ar an bhfiainise a nochtar sa chomhad, déanfar cinneadh mar a leanas:

Ionchúiseamh ar bith: Déantar cinneadh gan ionchúiseamh a thionscnamh. Is é is mó is cúis le cinneadh gan ionchúiseamh a thionscnamh ná nach leor an fhianaise atá sa chomhad mar thaca le hionchúiseamh. Maidir leis na figiúirí, áfach, liostaítear iontu na cinntí go léir gan ionchúiseamh a thionscnamh.

Ionchúiseamh ar díotáil: Déantar cinneadh chun ionchúiseamh a thionscnamh sa Chúirt Chuarda, sa Phríomh-Chúirt Choiriúil nó sa Chúirt Choiriúil Speisialta.

Diúscairt Achomair: Tá ionchúiseamh le déanamh sa Chúirt Dúiche i leith an chiona.

Faoi Bhreithniú: Comhaid nach bhfuil cinneadh déanta maidir leo. Áirítear san fhiúir seo na comhaid sin ina raibh gá le tuilleadh faisnéise nó imscrúdúcháin sula bhféadfaí cinneadh a dhéanamh. Is minice ná a mhalairt go lorgaítear tuilleadh faisnéise chun an cás a neartú seachas mar gheall ar aon easnamh san imscrúdú.




Comhaid Neamh-Ionchúisimh: De ghnáth, baineann na comhaid seo le hiarrataí ar chomhairle dhlíthiúil ón nGarda Síochána, ó aturnaetha stáit áitiúil agus ó ghníomhaireachtaí eile.

NÓTA: Rinneadh na figiúirí do na blianta 2001 & 2002 a uasdátú ó foilsíodh Tuarascálacha Bliantúla roimhe seo (féach an nóta a ghabhann le cairt 11.3). Maidir leis an laghdú ar chomhaid 'Faoi Bhreithniú', i gcomparáid leis na figiúirí sin a tugadh blianta roimhe seo, léiríonn siad forbairtí i dtaca leis na comhaid sin ó shin i leith. Áirítear in 'Ionchúiseamh ar díotáil' na cásanna sin iar roghnaigh cosantóirí dul faoi thriail agus cásanna inar dhiúltaigh an Breitheamh Dúiche dlínse, d'ainneoin gur roghnaigh an Stiúrthóir diúscairt achomair i dtosach. Déantar comhad 'Neamh-Ionchúisimh' a athaicmiú mar chomhad ionchúisimh más rud é go bhfaightear comhad Garda i ndáil leis an ábhar céanna ina dhiaidh sin.

Cairt 11.4






DIÚSCAIRT CHOMHAID RANNÁN NA dTREORACHA DE RÉIR LÍON NA gCOMHAD A FUARTHAS GACH BLIAIN




An Treoir a Tugadh	2003	%	2002	%	2001	%
Treoraíodh gan ionchúiseamh ar bith a dhéanamh	2358	31%	2210	30%	1999	29%
Treoraíodh ionchúiseamh ar díotáil a dhéanamh	2256	29%	2329	31%	2132	32%
Treoraíodh Diúscairt Achomair a dhéanamh	2216	29%	2152	29%	2135	31%
Faoi Bhreithniú	219	3%	164	2%	93	1%
Comhaid Neamh-Ionchúisimh	619	8%	623	8%	462	7%
IOMLÁN	7668	100%	7478	100%	6821	100%



Cairt 11.5

**DIÚSCAIRT CHOMHAID RANNÁN NA dTREORACHA DE RÉIR AN LÍON
DAOINE FAOI DHROCHAMHRAS AB ÁBHAR DO NA COMHAID A FUARTHAS**

An Treoir a Tugadh	2003	%	2002	%	2001	%
 Treoraíodh gan lonchúiseamh ar bith a dhéanamh	3678	35%	3519	35%	3381	36%
 Treoraíodh lonchúiseamh ar díotáil a dhéanamh	2777	27%	2804	28%	2648	28%
 Treoraíodh Diúscairt Achomair a dhéanamh	2848	28%	2765	28%	2863	30%
 Faoi Bhreithniú	481	5%	285	3%	145	2%
 Eile (lena n-áirítear athbhreithnithe breithiúnacha)	515	5%	548	6%	414	4%
IOMLÁN	10299	100%	9921	100%	9451	100%










MIONDEALÚ AR NA PRÍOMHCHÚISEANNA LE TREOIR GAN IONCHÚISEAMH A DHÉANAMH DE RÉIR DAOINE FAOI DHROCHAMHRAS MAR ATÁ LEATHA AMACH I gCAIRT 11.5

D'fhéadfadh sé tarlú, i ndáil le comhad ar leith, go ndéanfar cinneadh gan ionchúiseamh a thionscnamh ar chúiseanna éagsúla seachas na príomhchúiseanna atá leagtha amach sa chart seo (ar chúiseanna iad dá ngairtear 'neamhaicmithe' thíos). Seo a leanas roinnt samplaí de na chúiseanna sin: moill, an duine faoi dhrochamhras d'fháil bháis nó gan a bheith ar fáil, an gearánach d'fháil bháis nó gan a bheith ar fáil nó gearánach do dhiúltú fianaise a thabhairt.

Chart 11.6

MIONDEALÚ AR NA PRÍOMHCHÚISEANNA LE TREOIR GAN IONCHÚISEAMH A DHÉANAMH DE RÉIR DAOINE FAOI DHROCHAMHRAS MAR ATÁ LEATHA AMACH I gCAIRT 11.5

Na Príomhchúiseanna gan ionchúiseamh a dhéanamh	2003	%	2002	%	2001	%
 Fianaise Neamhdhóthanach	2772	76%	2559	72%	2299	68%
 An Clár Athstiúrtha d'Ógánaigh	157	4%	199	6%	243	7%
 Leas an Phobail	198	5%	178	5%	270	8%
 Forais Atruacha	55	1%	56	2%	52	2%
 Teorainn Ama Caite	286	8%	328	9%	366	11%
 Neamhaicmithe	210	6%	199	6%	151	4%
IOMLÁN	3678	100%	3519	100%	3381	100%




AN tAM A TÓGADH CHUN TREORACHA A EISIÚINT

I gcairt 11.7 taispeántar an t-am idir comhad ionchúisimh comhlánaithe a fháil san Oifig agus treoir a eisiúint i dtaobh an ceart nó nach ceart ionchúiseamh a dhéanamh i leith duine faoi dhrochamhras. Cinneadh an fhaisnéis seo a thaispeáint de réir líon na ndaoine faoi dhrochamhras seachas de réir líon na gcomhad mar go bhféadfadh sé tarlú, i gcás comhad ina bhfuil níos mó ná duine amháin faoi dhrochamhras i gceist, nach ndéanfar cinneadh i leith na ndaoine sin go léir ag an tráth céanna.

Bíonn difríochtaí ann idir comhaid ó thaobh méide agus castachta. Ina theannta sin, bhí gá le tuilleadh faisnéise nó imscrúdúcháin sula bhféadfaí cinneadh a dhéanamh. D'fhéadfadh sé go lorgófar tuilleadh faisnéise chun na cruthúnais a fheabhsú i gcás áirithe agus ní gá go dtuigfí as sin go bhfuil easnamh ann san imscrúdúcháin.

Chun figiúr níos cruinne a thabhairt, ní dhearnadh daoine faoi dhrochamhras ar lorgáidh tuilleadh faisnéise ina leith, ach nach bhfuarthas an fhaisnéis sin fós, ná daoine faoi dhrochamhras a bhfuil a gcásanna á mbreithniú fós a chur san áireamh sna figiúirí thíos. Dá bhrí sin, tá an t-iomlán níos lú ná an líon iomlán daoine faoi dhrochamhras mar atá leagtha amach i gCairt 11.3.



TORTHAÍ CÁSANNA - IONCHÚISEAMH AR DÍOTÁIL

I gcairt 11.8 taispeántar torthaí na n-ionchúiseamh a tionscnaíodh i ndáil le cosantóirí ar ina leith a tosaíodh ionchúiseamh sna blianta 2000 go 2002 (amhail Bhealtaine 2004).

Baineann na figiúirí leis na haicmí seo a leanas:

Ciontú: Fuarthas ciontú i leith ceann amháin ar a laghad de na cúisimh a bhí ann sa chás.

Éigiontú: Éigiontaíodh an cosantóir i ndáil le gach cúiseamh.




Níor Éisteadh Fós: Is iad seo na cásanna ina ndearnadh cinneadh chun ionchúiseamh a dhéanamh agus ar cásanna iad atá os comhair na gcúirteanna fós.

NÓTA: Níor cuireadh isteach aon fhiigiúirí don bhliain 2003 mar nár dhéileáil na cúirteanna le tromlach na gcásanna sin fós.

Cairt 11.8





TORTHAÍ CÁSANNA - IONCHÚISEAMH AR DÍOTÁIL




Toradh	2002	%	2001	%	2000	%
Ciontú	1810	64%	1814	69%	2206	71%
Éigiontú	79	3%	100	4%	136	4%
Níor Éisteadh Fós	837	30%	643	24%	682	22%
Scríosadh Amach/Scoireadh Díobh	78	3%	91	3%	84	3%
IOMLÁN	2804	100%	2648	100%	3108	100%



Cairt 11.9

MIONDEALÚ AR CHIONTUITHE AGUS ÉIGIONTUITHE AS CAIRT 11.8 THUAS (GAN CÁSANNÁ ATÁ LE HÉISTEACHT FÓS A ÁIREAMH)

MIONDEALÚ	2002	%	2001	%	2000	%
 Ciontú ag Giúiré	155	8%	150	8%	145	6%
 Ciontú tar éis Pléadáil Ciontach	1655	88%	1664	87%	2061	89%
CIONTUITHE SAN IOMLÁN	1810	96%	1814	95%	2206	95%
 Éigiontú ag Giúiré	45	2%	55	3%	78	3%
 Éigiontú ar Threoir ón mBreitheamh	34	2%	45	2%	58	2%
ÉIGIONTUITHE SAN IOMLÁN	79	4%	100	5%	136	5%
IOMLÁN	1889	100%	1914	100%	2342	100%



IARRATAIS AR PHIANBHREITHEANNA A ATHBHREITHNIÚ AR FHORAS RÓTHRÓCAIRE

Alt 2 den Acht um Cheartas Coiriúil, 1993

Déantar socrú le halt 2 den Acht um Cheartas Coiriúil, 1993 go bhféadfaidh an Stiúrthóir Ionchúiseamh Poiblí iarratas a dhéanamh chun na Cúirte Achomhairc Choiriúil chun athbhreithniú a dhéanamh ar phianbhreith arna gearradh ag cúirt na trialach más dealraitheach go raibh a phianbhreith a gearradh róthrócaireach de réir dlí.

I gcairt 11.10 thíos taispeántar sonraí faoin líon iarratas, agus faoi thoradh na n-iarratas, a éisteadh ón tráth a tugadh an tAcht isteach.


Cairt 11.10		IARRATAIS AR PHIANBHREITHEANNA A ATHBHREITHNIÚ AR FHORAS RÓTHRÓCAIRE			
BLIAIN AN IARRATAIS	AN LÍON IARRATAS	AN LÍON IARRATAS AR ÉIRIGH LEO	AN LÍON IARRATAS AR DIÚLTAÍODH DÓIBH	AR FEITHEAMH	EILE *
1994	2	-	1	-	1
1995	2	-	1	-	1
1996	3	1	1	-	1
1997	4	2	2	-	-
1998	12	6	3	-	3
1999	34	17	16	-	1
2000	31	15	13	-	3
2001	23	17	3	-	3
2002	23	14	9	-	-
2003	27	11	8	7	1

* Áirítear san fhigiúr seo iarratais a scriosadh amach agus a tarraingíodh siar

RANNÁN NA nATURNAETHA

Chomh maith le seirbhís aturnaetha a sholáthar don Stiúrthóir agus gníomhú thar ceann an Stiúrthóra, déileálann Rannán na nAturnaetha in Oifig an Stiúrthóra Ionchúiseamh Poiblí le roinnt cásanna nach gá a tharchur chuig Rannán na dTeoracha chun treoir nó cinneadh a fháil ina leith.

Léiríonn cairt 11.11 an líon cásanna ar déileáladh leo i Rannán na nAturnaetha amháin agus áirítear iontu an méid seo a leanas: comhaid ionchúisimh de chuid na Cúirte Dúiche; achomhairc ón gCúirt Dúiche chuig an gCúirt Chuarda; agus iarratais Ard-Chúirte ar bhannaí. Léiríonn an figiúr le haghaidh achomharc Cúirte Dúiche an líon comhad a shealbháitear (seachas an líon cúiseamh ar leithligh a ndearnadh achomhairc ina leith). D'fhéadfadh sé tarlú go bhfuil níos mó ná cúiseamh amháin ann i gcoinne cosantóirí áirithe.



CAITEACHAS OIFIGE

I gcairt 11.12 taispeántar miondealú ar chaiteachas oifige do na blianta 2003, 2002 & 2001.


Tuarastail, Pá & Liúntais: Seo costas thuarastail na foirne atá ar fostú san Oifig. Ba é an líon iomlán daoine ar an bhfoireann ar an 1 Eanáir 2003 ná 165.

Caiteachais Oifige: Baineann sé seo leis na costais a ghabhann le riaradh na hoifige i gcoitinne e.g. ceannach agus cothabháil trealaimh oifige, soláthairtí oifige, costais leabharlainne, cothabháil áitribh oifige, taisteal agus caiteachais theagmhasacha eile.

Táillí d'Abhcóidí: Íoctar na táillí seo leis na habhcóidí a dhéanann ionchúiseamh i leith cásanna thar ceann an Stiúrthóra sna cúirteanna coiriúla éagsúla. Cinntear na táillí de réir na bparaiméadar atá leagtha síos ag an Aire Airgeadais.

Caiteachais Ghinearálta Dlí: Baineann sé seo le híoc costas dlíthiúil a dhámhann na cúirteanna i ndáil le nithe a bhaineann le hathbheithnithe breithiúnacha agus i ndáil le hiarratais eile a bhfuil baint acu le himeachtaí dlíthiúla i gcoinne an Stiúrthóra.

NÓTA: Maidir leis an méadú ar 'Thuarastail, Pá & Liúntais' don bhliain 2002, léiríonn sé méadú ar an líon foirne in Oifig an Stiúrthóra Ionchúiseamh Poiblí de bharr aistriú fheidhmeanna rannán coiriúil Oifig an Phríomh-Aturnae Stáit chuig Oifig an Stiúrthóra Ionchúiseamh Poiblí in Eanáir 2002. Léiríonn an méadú ar 'Caiteachais Oifige' don bhliain 2002 an costas a bhain le feistiú na hoifige nua do Rannán na nAturnaetha in Oifig an Stiúrthóra Ionchúiseamh Poiblí.





TÁILLÍ D'ABHCÓIDÍ

I gcairteacha 11.13 & 11.14 taispeántar miondealú ar chaiteachas ar tháillí d'abhcóidí sna cúirteanna coiriúla éagsúla agus de réir reigiúin i leith na Cúirte Cuarda Coiriúla.

Maidir le táillí a íoctar le habhcóidí sa Phríomh-Chúirt Choiriúil, sa Chúirt Choiriúil Speisialta & sa Chúirt Cuarda Choiriúil, clúdaíonn siad comhairle a thabhairt faoi chruthúnais, díotálacha a dhréachtú, sainchomhairle a thabhairt, díotchúisimh, cásanna a chur i láthair agus láithrithe riachtanacha eile e.g. le linn pianbheitheanna a ghearradh.

Maidir le caiteachas ar tháillí san Ard-Chúirt, clúdaíonn sé, go formhór, iarratais ar bhannaí agus an obair ullmhúcháin agus éisteachtaí a bhaineann le hathbheithnithe breithiúnacha.





CAIBIDIL 12

Sliocht as Cuntas Leithreasa 2002

Is é atá sa mhéid seo a leanas ná sliocht as Tuarascáil Bhliantúil an Ard-Reachtair Cuntas agus Ciste agus Cuntais Leithreasa 2002.

Oifig an Stiúirthóra Ionchúiseamh Poiblí Vóta 14

CUNTAS ar an tsuim a caitheadh sa bhliain dar chríoch 31 Nollaig 2002 i gcomparáid leis an tsuim a deonaíodh agus ar an tsuim a fhéadtar a úsáid mar leithreasaí i gcabhair ina theannta sin, le haghaidh thuarastail agus chaiteachais Oifig an Stiúirthóra Ionchúiseamh Poiblí.

Seirbhís	Soláthar Measta €'000	Toradh €'000	Fabhrúcháin Deiridh €'000
RIARACHÁN			
A.1. Tuarastail, Pá agus Liúntais	6,920	6,346	-
A.2. Taisteal agus Cothú	206	123	3
A.3. Caiteachais Theagmhasacha	1,068	978	36
A.4. Seirbhísí Poist agus Teileachumarsáide	356	359	28
A.5. Innealra Oifige agus Soláthairtí Eile Oifige	709	1,256	8
A.6. Caiteachais ar Áitribh Oifige	1,337	1,196	(70)
SEIRBHÍSÍ EILE			
B. Táillí d'Abhcóidí	13,090	10,034	2,252
C. Caiteachais Ghinearálta Dlí	1,276	3,231	1,872
Iomlán Comhlán	24,962	23,523	4,129
<i>Asbhain -</i>			
D. Leithreasaí i gCabhair	7	87	-
Iomlán Glan	24,955	23,436	4,129
BARRACHAS ATÁ LE TABHAIRT SUAS	€1,519,317		

Oibriú an Achta sa Tréimhse ó 1 Eanáir 2003 go 31 Nollaig 2003

- 13.1 Déanann Oifig an Stiúrthóra Ionchúiseamh Poiblí íocaíochtaí le soláthraithe tar éis na hearraí nó na seirbhísí lena mbaineann a sholáthar go sásúil agus laistigh de 30 lá ón dáta a chuireann an soláthraí sonrasc ar fáil. I gcás táillí d'abhcóidí, cé nach mbíonn sonraisc ann, is é cleachtas na hOifige ná táillí abhcóidí a íoc laistigh de 30 lá ón dáta a fhaightear tuairisc an aturnae stáit áitiúil i ngach cás.
- 13.2 Sa tréimhse lena mbaineann, rinne an Oifig 20 íocaíocht dhéanach os cionn €317.43. Ba iad sin na híocaíochtaí ar fad a thabhaigh pionós i leith íocaíochta déanaí. Ba é luach iomlán na n-íocaíochtaí sin ná €82,770.44 as méid iomlán íocaíochtaí €2.5 milliún agus ba é an t-ús air sin ná €496.63.

Ráiteas an Oifigigh Chuntasaíochta

- 13.3 Tá Oifig an Stiúrthóra Ionchúiseamh Poiblí i measc na n-eagraíochtaí atá faoi réir théarmaí an Achta um Íoc Pras Cuntas, 1997. Tháinig an tAcht i bhfeidhm ar an 2 Eanáir 1998, agus ó shin i leith chomhlíon an Oifig téarmaí an Achta.
- 13.4 Déantar gach sonrasc ó sholáthraithe dátstampáil ar iad a fháil. Déantar sonraisc a cheadú agus a chur ar aghaidh lena n-íoc ar mhodh tráthúil lena chinntiú go ndéantar an íocaíocht laistigh den tréimhse iomchuí. Nuair a bhíonn na sonraisc á n-íoc déantar an dáta fála agus an dáta íochta a chur i gcomparáid lena chéile agus má táthar tar éis dul thar an teorainn ama iomchuí déantar íocaíocht úis go huathoibríteach. I gcásanna inar gá íocaíocht úis a dhéanamh, cuirtear an t-ábhar in iúl don lucht bainistíochta le gur féidir aon bheart feabhais is gá a dhéanamh.
- 13.5 Ní féidir leis na nósanna imeachta atá i bhfeidhm ach ráthaíocht réasúnach, seachas ráthaíocht iomlánach, a chur ar fáil i gcoinne neamhchomhlíonadh ábhartha an Achta.

Michael Liddy


Oifigeach Cuntasaíochta

Bealtaine 2004

PART VI
CAIRTEACHA


CAIBIDIL 14

ACHOIMRE AR AN bPRÓISEAS IONCHÚSIMH CHOIRIÚIL



CAIBIDIL 15

STRUCHTÚR EAGRÚCHÁIN



CUID VII AGUISÍN

Caibidil 3: Obair na hOifige i gCoitinne

- A.1 Is é atá i bhfeidhm bhunúsach an Stiúrthóra Ionchúiseamh Poiblí ná ionchúisimh choiriúla agus nithe gaolmhara coiriúla a stiúradh agus a mhaoirsiú de réir na bhforálacha dlíthiúla. Cé go gcomhlíontar an fheidhm sin uaireanta i gcomhar le gníomhaireachtaí seachas an Garda Síochána, ar mhaithe le soiléire sa tuarascáil seo, déantar breithniú ginearálta ar an ábhar seo i ndáil le cásanna a thig ón nGarda Síochána, agus uathu sin amháin, ar cásanna iad arb ionann a méid agus níos mó ná 95% de chás-obair na hOifige. Áirítear na gníomhaireachtaí seo a leanas i measc na ngníomhaireachtaí imscrúdúcháin eile dá dtagraítear: Ranna Rialtais, na Coimisinéirí Ioncaim agus an tAturnae Ioncaim, An Post, an tÚdarás Iomaíochta, an tÚdarás Náisiúnta um Shábháilteacht agus Sláinte Ceirde, agus údaráis áitiúla.
- A.2 Áirítear an méid seo a leanas in obair na hOifige:
- (i) breithniú a dhéanamh ar chomhaid imscrúdúcháin choiriúil a chuireann an Garda Síochána faoi bhráid na hOifige
 - (ii) cinneadh a dhéanamh i dtaobh an ceart ionchúiseamh a thionscnamh nó i dtaobh an ceart ionchúiseamh atá tionscanta cheana féin ag an nGarda Síochána a choimeád ar marthain agus comhairle a thabhairt maidir le haon imscrúdúcháin eile atá riachtanach i ndáil le hionchúiseamh a thosú nó a choimeád ar bun
 - (iii) cinneadh a dhéanamh i dtaobh cad iad na cúisimh atá le déanamh agus breithniú a dhéanamh ar aon chúisimh atá déanta cheana féin
 - (iv) cinneadh a dhéanamh maidir leis na cruthúnais agus na hábhair eile atá le tabhairt don chúirt agus don chúisí, lena n-áirítear saincheisteanna maidir le ábhar nár úsáideadh a nochtadh don chosaint
 - (v) teoracha ginearálta a thabhairt maidir leis an tslí ina seolfar trialacha coiriúla lena n-áirítear cinntí a eisiúint maidir leis an iliomad ceisteanna ar phoncanna dlí agus ar bheartas poiblí a d'fhéadfadh teacht chun cinn le linn imeachtaí coiriúla
 - (vi) dul i gcomhairle, de réir mar is gá, le habhcóidí, le haturnaetha stáit, le comhaltaí den Gharda Síochána agus le daoine a mbeidh fianaise eolaíoch nó theicniúil á tabhairt acu
 - (vii) cinneadh a dhéanamh i dtaobh an ceart achomhairc, lena n-áirítear achomhairc ar mhodh cáis shonraithe, a thionscnamh, nó an ceart cur i gcoinne achomharc, agus ionchúiseamh nó cosaint a dhéanamh i leith imeachtaí le haghaidh athbhreithnithe bhreithiúnaigh agus habeas corpus a éiríonn as imeachtaí coiriúla
 - (viii) pianbhreitheanna a mheastar a bheith róthrócaireach a tharchur chuig an gCúirt Achomhairc Choiriúil
 - (ix) breithniú a dhéanamh ar ghearáin agus ar líomhaintí i dtaobh cionta coiriúla a bheith déanta, ar gearáin agus líomhaintí iad a thagann ó dhaoine den phobal agus, más cuí, iad a chur ar aghaidh chuig Coimisinéir an Gharda Síochána
 - (x) breithniú a dhéanamh ar chomhaid a fhaightear ón mBord um Ghearáin i gcoinne an Gharda Síochána
 - (xi) dréachtú nó réiteach doiciméad atá riachtanach i ndáil le próiseáil a dhéanamh ar iarrataí ar eiseachadhadh isteach sa Stát
 - (xii) iarrataí a dhréachtú agus dhéanamh maidir le cabhair fhrithpháirteach idirnáisiúnta in ábhair choiriúla

- (xiii) fónamh ar choistí agus freastal ar chruinnithe a bhaineann le hionchúisimh agus le dlí coiriúil agus le nós imeachta coiriúil; fadhbanna oibríochta a shainnithint a éiríonn as riaradh an dlí choiriúil agus cabhair a thabhairt, ar iarraidh a fháil, maidir le nithe a bhaineann le reachtaíocht choiriúil atá beartaithe; léachtaí a thabhairt i gColáiste Oilíúna an Gharda Síochána
- A.3 Gné thábhachtach bhuan d'fheidhmeanna an Stiúrthóra maidir le hionchúiseamh a dhéanamh i leith cionta is ea a chuid cumhachtaí faoi ailt 45 go 48 go huile den Acht um Chiontaí in aghaidh an Stáit, 1939. Le fírinne, i gcásanna áirithe, is ionann na cumhachtaí agus na dualgais sin agus aísghairm ar an gceart ginearálta bunreachtúil chun triail a fháil le giúiré. Áirítear iontu orduithe a eisiúint faoi alt 47(1) á rá go gcúiseofar daoine i gCúirt Choiriúil Speisialta seachas sna gnáthchúirteanna, agus deimhniú a thabhairt de bhun alt 46(2), 47(2) nó 48 á rá nach leor na gnáthchúirteanna chun a chur in áirithe go riarfar an ceartas i ndáil le cásanna áirithe.
- A.4 Déanann an Stiúrthóir feidhmeanna éagsúla eile a chomhlíonadh maidir le hionchúiseamh a dhéanamh i leith cionta. Mar shampla, Toilithe a eisiúint á chumasú déileáil go hachomair le cionta indíotáilte (alt 2 den Acht um Cheartas Coiriúil, 1951, agus alt 13 den Acht um Nós Imeachta Coiriúil, 1967), roghnú a dhéanamh idir nósanna imeachta achoimre agus nósanna imeachta indíotáilte i gcás cionta reachtúla áirithe, ordú a thabhairt go dtionscnófar cineálacha áirithe ionchúisimh nach mór don Stiúrthóir, de réir dlí, a thoilíú a thabhairt ina leith, mar shampla ionchúisimh mar gheall ar éilliú, cóiriú coil, éigniú ar chéile, ionchúiseamh a dhéanamh faoin Explosive Substances Act, 1883, faoin Acht um Rúin Oifigiúla, 1963, agus faoin Acht um Cheartas Coiriúil (Gáinneáil ar Dhrugaí), 1996, agus deimhnithe a dheonú, de bhun alt 29 den acht Cúirteanna Breithiúnais, 1924, lena chumasú do dhaoine cúisithe achomharc a dhéanamh ón gCúirt Achomhairc Choiriúil chuig an Ard-Chúirt ar phonc dlí lena ngabhann tábhacht phoiblí urghnách.
- A.5 Tá feidhmeanna ag an Stiúrthóir anois faoi fhorálacha an Achta um Cheartas Coiriúil, 1994, sa réimse intíre agus sa réimse idirnáisiúnta araon, ar feidhmeanna iad a bhaineann le horduithe chun sócmhainní coiriúla a shrianadh agus a choigistiú, i ndáil le sciúradh airgid agus i ndáil le cabhair fhrithpháirteach idirnáisiúnta in ábhair choiriúla.
- A.6 Ina theannta sin feidhmíonn an Stiúrthóir feidhmeanna sonracha faoi reachtaíocht lena rialaítear toghcháin agus reifrinn, go háirithe i ndáil le hachainíocha toghcháin agus reifrinn, agus faoi Acht na gCuideachtaí.
- A.7 Déanann an Stiúrthóir abhcóidí a ainmniú agus, tríd an tSeirbhís Aturnaetha Stáit, tugann sé treoracha d'abhcóidí, sna cúirteanna trialach éagsúla, san Ard-Chúirt agus sa Chúirt Uachtarach, agus sa Chúirt Achomhairc Choiriúil agus i gcúirteanna eile ina n-áirithítear abhcóidí thar a cheann, agus cinneann sé méid na dtáillí a fhaigheann na habhcóidí sin agus íocann sé na táillí sin.

